

Keriso Ena 'Abi IBAWAIRA TINANA Ioane Herenai

Puka Aona Irerena 'Abina

Puka neiana hanona rani weiana a'ikakauma haukia Obiapaka Iesu Keriso tea'ikakaumana paunai tebahaiara ki'anakia aonai ererena. Puka neiana ena poki hanona haiara weiana aonai ia kebataburanakia ba ekia a'ikakauma a'i katehabona. Puka neiana aonai 'abi ibabataikia ebo'o, taba muriai katerama 'ao aba tirama haukia 'abikia ehina. Ibabatai weiakia ekia aka tohana hanona neiana. Iesu Keriso hanona Obiapaka, ba ia imanai Tirama kehore ena 'ou haukia ikoinai kehao hainakia, mai Satani abomo ua kehaohai aihona. Ba Iesu aka neiakia ikoikiai kebaorenakia hanona Tirama kehore weiakia tekori 'ini mai ekia a'ikakauma a'i teba'ehona haukia 'arafia namokia kebenakia. Ia hanona Tirama kipokia katemiaho, puma mai haiara hanona keaha'i, pokina Tirama hanona taba ikoikiai kebaheainakia katemahamaha.

Puka Paipana Apa'uakia

- a. Roba iahu. (1.1-8)
- b. Mahabanai ikaikauna mai marea robe 7 ekia marere. (1.9—3.22)
- c. Puka iouna mai ikaiabu hoana 7. (4.1—8.1)
- d. Pihī 7. (8.2—11.19)
- e. Dragona mai aiahu mahikia rua. (12.1—13.18)
- f. Ihakia haeai haeai. (14.1—15.8)
- g. Tirama ena opuere puoukia 7. (16.1-21)
- h. Babulonia e'eho. (17.1—20.10)

- i. Bakai apa'uana orena. (20.11-15)
- j. Kupa, hanopaka, mai Ierusalemahama-hakia. (21.1–22.5)
- k. 'Abi orekia. (22.6-21)

Puka Pouna Ihinana 'Abina.

¹ Au, Ioane, Iesu Keriso ebawaira tinana 'abina puka neianai narerena. Tirama ehore Iesu ebena ena ta'ara'i haukia herekiai rani a'i kehoma'a tabakia katerama haukia kebaihanakia. Weiana Iesu ena aneru ha euhuna, ena ta'ara'i hauna Ioane ebaihana.

² Weiana Ioane ehore Tirama ena 'abi mai Iesu Keriso ena 'abi aiakia eo'o mai eihanakia tabakia ikoikiai ehina pounakia.

³ Mahabanai 'abikia neiakia katetuabi haukia hanona tenamo, abomo puka neianai terere 'abikia kateona mai aokia ikoinai kateka'aina haukia hanona tenamo, pokina taba neiakia ikoikiai katerama ranina hanona aba herekai.

Ioane Marere Ererena Tirama Ena Marea 'Abaihau Hamomo Herekiai.

⁴ Au Ioane Tirama ena marea 'abaihau hamomo Asia hanonai narerebenimi. Bariu nemiaho, 'uainai abomo emiaho, haemona wairai kemai Tiramana, mai ena obia imia'auna wairanai auba 'abaihau hamomo tekoroti haukia,

⁵ mai Iesu Keriso kipokia ekia aoko'o hoana mai baibua ahamiai kemiaho. Iesu Keriso hanona Tirama ena 'abi maikoina nehina pou haraina hauna, 'ariai mikiri mue kori'uaina hauna abomo hanopaka obiakia 'arafia ikoikiai ekia poki.

Eraona'au ainaka paunai ena 'ari aruarunai eka ki'a herekiai erubunaka.

⁶ Ena obia aiarana mai ena robe haukai ebaonaka Hamana Tirama ena aka kahababai. Iesu Keriso herenai nuabi mai hiabu katemiaho keaomo banaibanai. Amen.

⁷ Tomoihana Iesu hanona 'auhao ai nimai, maearima ikoikiai mahakia hanona ia kateihana, robuna tekomona haukia abomo kateihana, hanopaka itubukia maearimana ikoikiai ia paunai katehai 'ari. 'Abi tohana, neiana hanona kerama toha. Amen.

⁸ Obiapaka Tirama ni'abi netibaha, “Au hanona Alepa mai Omega, Kori'uaina mai Murihaina. Au hanona bariu namiaho 'uaina abomo ami-aho, haeamona wairai kamai, hiabu ikoinei Tirama.”

Ioane Keriso Eihana.

⁹ Au, Ioane, wai uaho'abami kipokia nahamiahao haemo, ena obia aiarana aonai mai hau haiara hamona aonai mai bapahihika Iesu paunai. Tirama ena 'abi mai Iesu pouna ahina waira tinana paunai Patamo kereibuanai tehorotina'u namiaho.

¹⁰ Weiana Obiapaka ena beraurai Auba Robe hanona au ao'u ebonu 'auna, weiana muri'u ai aia ha apa'uana matoa pihi 'uruna 'abana aona,

¹¹ ia etibaha, “Neiakia noihanakia tabakia hanona puka ai morerenakia kouhuna keao Tirama ena marea 'abaihau hamomo aiara neiakiai temiaho haukia herekia, Epeso, Semurana, Peregamo, Tuatira, Sadi, Piladelpia, mai Laodikea.”

¹² Weiana akori kabe e'abi bena'u hauna kaihana na ahoma. Iamo gold ramepakia 'abaihau hamomo tekoroti aihanakia.

¹³ Ramepa baiatakiai hau ha ekoroti, ia ihana matoha Maearima nahuna 'abana, ena habuni hanona ehoma'a eaomo aena etaro abunakia, haharanai hanona gold 'apana e'aberenana.

¹⁴ Arana mai buina hanona tepore obo harai matoha poame 'abana 'ao 'auhao porena 'abana. Mahana ihakia hanona matoha iruba neupa 'abana.

¹⁵ Aena hanona matoha kopa iruba aonai ni-baubaea ne'imare 'imare 'abana. Aiana hanona matoha roio rarikia tihara puni 'urukia 'abana.

¹⁶ Imana itipanai bihiu 'abaihau hamomo ea'inakia, kareba ha mahana abira abira teara hauna pinanai ekarahi. Mai wairana ihana hanona matoha atiaha beraura nirara eana 'abana.

¹⁷ Ia aihana raninai a'eho aena pokinai a'umuti, matoha a'ari 'abana. 'A ia ehore imana itipana hau'u ai ehao'au, e'abi etibaha, "A'i mota'u, au hanona kori'uaina mai murihaina.

¹⁸ Au hanona mauri hau'u, au a'ari iamo amaauri haeamona kamauri banaibanai. Au hanona ki a'ina weiana mai e'u hiabu 'ari haukia ekia 'eka kakaikauna kamaiaianakia katemaauri.

¹⁹ Ua buonai noihanakia tabakia morerenakia, neiakia hanona bariu temiaho tabakia haeamona wairai katerama tabakia.

²⁰ Bihiu 'abaihau hamomo ima'u itipanai mai gold ramepakia 'abaihau hamomo oihanakia. Neiakia hanona 'abi bunikia ba anikia hanona nahomana, bihiu 'abaihau hamomo hanona Tirama ena marea 'abaihau hamomo ekia

aneru,* mai gold ramepakia 'abaihau hamomo hanona Tirama ena marea 'abaihau hamomo.”

Marere Keao Epeso ai.

2

¹ Ia e'abi etibaha, “Tirama ena marea Epeso aiaranai hauna ena aneru na korere beni aihona. Hau weiana bihiu 'abaihau hamomo imana itipana aonai ea'inakia haeamona gold ramepakia 'abaihau hamomo tekoroti baiatakiai nikabanai kabanai hauna ena 'abi neiana.

² Au oi emu babai, emu aro'ari mai emu bapahihi hanona a'iobinakia. Haeamona a'iobina aka ki'a haukia a'i oiha haonakia, weiakia kipokia iuhubeau haukia ai tebaonakia haukia 'a ia hanona iuhubeau haukia tohakia aha'i, ba obahobonakia hanona o'iobinakia bai'oi haukia.

³ Oi hanona obapahihi, mai atetua aokiai au ata'u paunai obakiro, a'i ohaba 'apua.

⁴ Iamo emu ki'a hanona neiana, emu raona'au kori'uaina au here'uai hauna aba ohabona.

⁵ Ua buonai 'eka weianai o'eho hauna moraonana, koraona kabe, aka weiakia obabai 'uainakia haukia kobabai muenakia. Emu ki'ai a'i koraona kabe raninai, au hanona kawahi emu ramepa ena koroti 'ekanai ka'i obona.

⁶ 'A emu namo hamona hanona neiana. Nikolaita haukia ekia hoahoa 'arikia a'i nu'ari, ihobona au abomo ekia hoahoa 'arikia a'i na'ari 'abana.

* 1:20: (20) 'ao iuhubeau

7 Mai haiana hauna kehore Auba Robe ena 'abi Tirama ena marea maearimakia nehina benakia hauna aiana keona. Ena a'ikakauma ketabura, ki'a aokiai kekabanai hauna hanona bero kabena mauri nibaibeni matiuna buabuana keani, matiu weiana hanona Tirama ena uma nuabina aonai ni'omu.”

Marere Keao Semurana ai.

8 Ia e'abi mue etibaha, “Tirama ena marea Semurana aiaranai hauna ena aneru ʒa korere beni aihona.

Hau weiana Kori'uaina mai Murihaina hauna, e'ari haeamona emauri mue hauna ena 'abi neiana.

9 Emu hau haiara mai emu uraru hanona aba a'io binakia. Iamo oi hanona aba kepu haumu. Maearima weiakia kipokia Iuda haukia tibaonakia haukia ekia 'abi ki'a oi here-muai hanona a'io bina, ia hanona Iuda haukia tohakia aha'i, ia Satani ena marea haukia.

10 Aba kohau haiara iamo haiara weiana a'i kota'u aina. Haiamuai ʒa'abi, Tiaporo kehore wai baika kehobonimi weiana wapura itu-nai kekaiabunimi ba wapu harauhaea katohau haiara. Iamo oi hanona emu a'ikakauma au here'uai hauna koa'i 'inina keaomo ko'ari re'a, ba au kahore mauri kabeni'o matoha 'uai hoana kobau'una 'abana.

11 Mai haiana hauna kehore Auba Robe ena 'abi Tirama ena marea maearimakia nehina benakia hauna aiana keona. Ena a'ikakauma ketabura, ki'a aokiai kekabanai hauna hanona 'ari ibaruanai a'i kehaiara 'apua.”

Marere Keao Peregamo ai.

12 Ia e'abi mue etibaha, “Tirama ena marea Peregamo aiaranai hauna ena aneru na korere beni aihona.

Hau weiana kareba mahana abira abira teara ea'ina hauna ena 'abi neiana.

13 Emu miaho 'ekana hanona a'iohina, Satani ena obia imia'auna hanona naia. Iamo oi ohore au ata'u oa'i 'inina, baiatamiai Antipa aia ibabua 'au hauna au pou'u ehinana hauna, ba Satani ena miaho 'ekana weianai teahu 'arina aonai abomo emu a'ikakauma au here'uai hauna a'i obuniai aina.

14 Iamo emu ki'a baika hanona neiakia. Maearima baika naia hanona mahabanai hauna Balam ena ba'iohi 'abikia tika'ai ohonakia, hau weiana ehore Balak eba'iohina, ba ena ba'iohi bai'oina weianai Isaraela haukia tebabai ki'a, weiana ia tehore kaiba'uku ibarobekia anianikia teani mai nabau hoahoakia ki'a obokia tebabainakia.

15 Taeara ihobonai mo baika naia heremiai hanona Nikolaita haukia ekia ba'iohi 'abikia bai'oikia abomo tika'ai ohonakia mai ki'a ihobokiamo tibabainakia.

16 Ua buonai tomoraona kabe. Keaha'i rani-nai, au kipo'u kawahi biai, pina'u karebanai kahu 'arinakia.

17 Mai haiana hauna kehore Auba Robe ena 'abi Tirama ena marea maearimakia nehina benakia hauna aiana keona. Ena a'ikakauma ketabura, ki'a aokiai kekabanai hauna hanona aniani atana mana baika tebuni haukia ia kabena, abomo au kahore pihara porena ha ahanai ata mahamahana ha irere'au hauna ia kabena. Pihara ia'ina hauna mo kipona ata weiana ke'iohina.”

Marere Keao Tuatira ai.

18 Ia e'abi mue etibaha, “Tirama ena marea Tuatira aiaranai hauna ena aneru ŋa korere beni aihona.

Tirama Nahuna weiana mahana ihakia hanona matoha iruba neupa 'abana, aena hanona matoha kopa ne'imare 'imare 'abana hauna ena 'abi neiana.

19 Au hanona oi emu babai a'iohina. Emu raona'au, emu a'ikakauma, emu barai'arai, mai emu bapahihi hanona a'iohinakia. Haeamona bariu emu babai neiakia hanona emu babai 'ai'aikia tetara haonakia.

20 Iamo emu ki'a hanona neiana, oi hanona babi'e weiana atana Isabela kipona mahabanai babi'enai nibaona babi'ena hanona noiha haona. Ia ena ba'iohina e'u ta'ara'i haukia nibaka'a ki'anakia niaoainakia maha porepore akakia ki'a obokia tibabai haeamona kaiba'uku ibarobekia anianikia tiani.

21 Au hanona ia ena rani aba ha abena ena maha porepore hoahoakia weiakiai keraona kabe. Ia a'i nenuatae.

22 Ua buonai au kahore inawa itaranai kakapo 'auna weia kehaiara 'ari ki'a baha, haeamona weiakia ia kipokia tinabau haukia a'i kateraona kabe raninai, ia abokiamo kabahaiara ki'a bahanakia.

23 Ia nahuna abokiamo kahuahu 'arinakia. Weianai hanona Tirama ena marea haukia ikoikiai kate'iohina, au hanona maearima aokia mai ekia raonaraona bunikia natabu ahinakia hau'u, mai au kahore wai ha ha emu babaimo ihobokiai 'arami kabamuena.

24 'A bariu wai harina maikoina Tuatirai babi'e naiana ena ba'iohina 'abikia uahomakia a'i tuka'ainakia mai Satani ena buni tabakia tohakia ŋa tiho haukia a'i to'iohina haumi, nahina

benimi ahamiai puma ha a'i kahore 'auna.

²⁵ Iamo wai taba namona aba toa'ina hauna katoa'i 'ini haraina keaomo au kawahi.

²⁶ Ena a'ikakauma ketabura, ki'a aokiai ke-
abanai hauna haeamona e'u nuatae akana ke-
babai haraina keaomo puanai hauna hanona
hiabu kabena, ia kehore hanopaka maeari-
makia keobia ainakia.

²⁷ 'Ia auri ikai'ininai kepoki ainakia, keahu
'iti'itinakia matoha uro 'abana.' Ihobona au
Hama'u herenai hiabu a'ina 'abana.

²⁸ Au kahore raurani bihiuna abomo ia
kabena.

²⁹ Mai haiana hauna kehore Auba Robe ena
'abi Tirama ena marea maearimakia nehina be-
nakia hauna aiana keona."

3

Marere Keao Sadi ai.

¹ Ia e'abi etibaha, "Tirama ena marea Sadi
aiaranai hauna ena aneru na korere beni aihona.
Auba 'abaihau hamomo weiakia Tirama ena
aka tibabaina haukia mai bihiu 'abaihau
hamomo ea'inakia hauna ena 'abi neiana.

Au emu babai hanona a'iobinakia, robamu
teahuna tetibaha, "Tirama ena marea neiana
hanona nimaui,' iamo oi hanona aba o'ari.

² Ua buonai mono'a, heremuai temiaho
tabakia aba kate'ari baihana haukia mobatabu-
ranakia, pokina emu babai bero'auna ha e'u
Tirama wairanai a'i atabu ahina.

³ Taba oa'ina mai ona hauna moraona 'in-
ina, moka'ai haraina, abomo emu ki'ai moraona
kabe. Iamo a'i kono'a raninai au hanona bainao
hauna 'abana kawahi, e'u wahi beraurana hoana
hanona a'i o'iohina.

⁴ Iamo naia Sadi ai hanona Tirama ena maearima baika ekia habuni a'i teba'opunakia weiakia hanona ekia hoahoa tenamo, ia hanona mai ekia bero habuni porekia katebatotonakia au kipokia kataka'a haeamo.

⁵ Taeara ihobonai ena a'ikakauma ketabura, ki'a aokiai kekabanai hauna hanona habuni poren kebatotona, ia atana abomo mauri pukanai a'i kakakina, 'a Hama'u wairanai mai ena aneru wairakiai ia atana kahinana.

⁶ Mai haiana hauna kehore Auba Robe ena 'abi Tirama ena marea maearimakia nehina benakia hauna aiana keona.”

Marere Keao Piladelpia ai.

⁷ Ia e'abi mue etibaha, “Tirama ena marea Piladelpia aiaranai hauna ena aneru na korere beni aihona.

Erobe mai 'abi tohana hauna, mai Davida ena ki ea'ina hauna, ia taba ekaikauna hanona hau ha a'i kekaiabuna, haeamona ia taba ekaiabuna hanona hau ha a'i kekaikauna hauna ena 'abi hanona neiana.

⁸ Au hanona oi emu babai a'iohina. Moihana, au pa'abi ha oi wairamu ai aba akaikauna, weiana hau ha kekaiabuna hanona a'i ketaina. A'iohina emu tabura hanona a'i eapa'ua, iamo e'u 'abi aba o'ima haraina mai ata'u a'i obuniaina.

⁹ Moihana, weiakia kipokia Iuda haukiai tibaonakia haukia hanona tibai'oi, ia hanona Iuda haukia tohakia aha'i, ia Satani ena marea haukia. Au kahore maearima weiakia kamaianakia oi aemu pokinai katekaipehu, kate'iohina au hanona oi naraona'au aini'o.

10 Pokina oi ohore e'u bahiahi 'abina weiana atetua aokiai kobapahihi hauna aba o'ima haraina, ua buonai au kahore oi abomo ka'ima haraini'o hanopaka ena atetua ranina kemai aonai, weiana hanona maearima ikoinai kahobonakia hanopaka neiana ahanai.

11 Au hanona aba kawahi, emu a'ikakauma aonai kotabura harai, weiana hau ha a'i mehore emu 'uai hoana 'aramu ai obau'una hauna a'i mepuhu boini'o.

12 Ena a'ikakauma ketabura, ki'a aokiai kekananai hauna hanona e'u Tirama ena marea robe kupuanai kabaona, ba ia hanona 'eka weiana a'i kehabona. Au kahore ia ahanai e'u Tirama atana, mai e'u Tirama ena aiara, weiana Ierusalemahana, e'u Tirama herenai weia kupa ai keriri hauna atana karerenakia, mai au ata'u mahamahana abomo ia ahanai karerena.

13 Mai haiana hauna kehore Auba Robe ena 'abi Tirama ena marea maearimakia nehina benakia hauna aiana keona.”

Marere Keao Laodikea ai.

14 Ia e'abi mue etibaha, “Tirama ena marea Laodikea aiaranai hauna ena aneru na korere beni aihona.

Amen pokina hauna, aia ibabua'auna hauna, mahanai eihana ehina poua hauna tohana, mai Tirama ehabainakia tabakia ikoinai pokina hauna ena 'abi hanona neiana.

15 Au hanona oi emu babai a'iohina, oi hanona a'i o'amari mai a'i ohiabu. Au e'u nuatae hanona kohiabu toha 'ao ko'amari toha.

¹⁶ Iamo oi hanona ohiabu hiabu, a'i ohiabu toha mai a'i o'amari toha. Ua buonai au kahore pina'u ai ka'atoti ahini'o.

¹⁷ Oi nu'abi notibaha, 'Au hanona kepu hau'u, e'u taba tebo'o, taba ha a'i akapu.' Iamo a'i o'jobina oi hanona oki'a ki'a baha, kateaoko'oai ki'ani'o, nouraru, mahamu teki'a, abomo mai-haumu.

¹⁸ Au oi narobeni'o, here'uai gold kokawana aba irubai tebamaha mahana hauna, ba kepu haumu tohamuai koao. Here'uai habuni porena abomo kokawana kobototona, weiana mai haumu emu haumaea kepua, mai here'uai maha muramurana kokawana, weianai mahamu koutunakia ba taba koihanakia ketaina.

¹⁹ Au naraona'au ainakia haukia hanona narikenakia mai na'atinakia, ua buonai bero akakia konuataeai ki'a bahanakia, mai ki'ai ko-raona kabe.

²⁰ Moihana, au hanona pa'abi 'akonai akoroti, naharahara. Hau ha aia'u keona abomo pa'abi kekaikauna raninai, ia 'eunai kakatoto herenai kataniani mai ia au here'uai kataniani.

²¹ Ena a'ikakauma ketabura, ki'a aokiai kek-abanai hauna hanona bero kabena e'u obia imia'auna ahanai katamiati haeamo, ihobona au atabura, ki'a aokiai akabanai, ba Hama'u ohi ena obia imia'auna ahanai tamiati haeamo 'abana.

²² Mai haiana hauna kehore Auba Robe ena 'abi Tirama ena marea maearimakia nehina benakia hauna aiana keona.”

4

Tirama Tekuti aina Kupai.

¹ Taba neiakia murikiai, maha'u eao kupai pa'abi ha ikaikau waira'uai ekoroti aihana. Ba aia weiana ehinabe 'uaina'u 'uruna matoha pih'i 'uruna 'abana hauna e'abi etibaha, "Mokara'au omai neia, taba neiakia murikiai katerama haukia kabaihani'o."

² Au hanona beronai mo Auba Robe ao'u ebabonu 'auna, ba waira'uai hanona obia imia'auna ha kupai aihana mai hau ha imia'au weiana ahanai emia'au.

³ Emia'au hauna ihaihana hanona ea ki'a baha matoha pihara namoabukia atakia daia-mond hauna eiroro mai rubi hauna ebiro haukia 'abana, 'opa ehore obia imia'auna weiana ekaka-iarona, ihaihana hanona ea ki'a matoha pihara namoabuna atana emerald hauna ekupa 'abana.

⁴ Obia imia'aukia ikoinai haraurua bani obia imia'auna apa'uana tekai kakaiaron'a abomo kiro haukia haraurua bani obia imia'aukia weiakia ahakiai temia'au, habuni pore obokia tebatoto mai 'arakiai hanona obia ibau'ukia gold ai ibabai haukia tebau'unakia.

⁵ Obia imia'auna weianai hanona kupa 'imarekia, 'uru rarikia mai kupa niro'u 'urukia ao'o. Obia imia'auna wairanai ramepa 'abaihau hamomo teara mai upa upakia. Neiakia hanona Tirama ena auba te'abaihau hamomo.

⁶ Abomo obia imia'auna wairanai hanona 'aku nemiaho, eiroro waira 'akinai matoha pihara namoabuna atana kristal 'abana.

Ibuanai hanona mauri tabakia ikoinai bani obia imia'auna tekori kakaiaron'a, ia wairakiai mai murikiai hanona maha 'abaeana teka ka-iaronakia.

⁷ Mauri tabana kori'uaina hanona ihana ma-

toha mahi atana laiona 'abana, ibaruana hanona ihana matoha poromakau nahu 'abana, ibaihauna wairana hanona ihana matoha maearima wairakia 'abana, ibabanina hanona ihana matoha po'i nirobo 'abana.

⁸ Ia mauri tabakia bani weiakia hanona ha ha banikia 'abaihau, ba banikia weiakia aokiai mai kapekiai hanona mahakia mo 'abaeana. Ia hanona mararani mai rabi a'i tiarai ia ti'abi to'ona tetibaha,

“Erobe, erobe, erobe. Obiapaka hiabu ikoinai Tiramana hanona erobe. Ia hanona 'uainai emiaho, bariu nemiaho, haeamona wairai kemai hauna.”

⁹ Mauri tabakia neiakia tihore mauri banaibanai Tiramana obia imia'auna ahanai emia'au hauna herenai nuabi mariki mai namo 'abina tibena aonai,

¹⁰ kiro haukia haraurua bani tihore obia imia'auna ahanai emia'au hauna wairanai tikaipehu mauri banaibanai Tiramana tekuti aina. Ekia obia ibau'ukia 'arakiai tibau'unakia haukia tia'i obonakia obia imia'auna wairanai tibaenotina, ba ti'abi tetibaha,

¹¹ “Emai Obiapaka emai Tirama e, oi hanona mai emu bero nuabi mai mariki mai hiabu koa'inakia. Pokina oi ohore taba ikoikiai obaramanakia. Emu nuatae paunai taba ikoikiai terama ba temiaho.”

5

Ioane Puka Iouna Ha Eihana Mai Ikaiabu Hoana.

¹ Epua obia imia'aunai emia'au hauna aihana imana itipanai hanona puka iouna ha ea'ina, aonai mai kapenai marere tererenakia, puka kapena hanona ikaiabu hoakia ba weiakia hanona 'abaihau hamomo puka kapenai.

² Ba aneru taburana ha aihana eio aota etibaha, “Tai mai ena bero hauna kehore puka ahanai ikaiabu hoahoakia neiakia keba pa'anakia ba kekaikauna?”

³ Iamo hau ha kupai 'ao hanopakai mai hanopaka ba'anai ha a'i etaina puka iouna weiana kekaikauna abomo aona keihana.

⁴ Weiana au ahai, ahai 'ari ki'a baha pokina hau ha a'i ebero harai puka iouna weiana kekaikauna abomo aona keihana.

⁵ Ia kiro hauna ha ehina bena'u etibaha, “A'i kohai, Iuda itubuna ena Laiona weiana Davida ena rama ramuna hauna 'ou haukia eahu parenakia hauna, ia kehore puka iouna ahanai ikaiabu hoakia 'abaihau hamomo keba pa'anakia puka kekaikauna.”

Ioane Mamoe Nahu Eihana.

⁶ Weiana obia imia'auna 'ekana ibuanai Mamoe nahu ha ekoroti aihana ihana matoha 'uainai teahu 'arina 'abana, mauri tabakia bani mai kiro haukia weia tekori kakaiarona, ia 'eana hanona 'abaihau hamomo mahana abomo 'abaihau hamomo, mahana weiakia hanona Tirama ena auba 'abaihau hamomo eahunakia teo hanopaka ikoinai haukia.

⁷ Mamoe nahu hanona eao obia imia'aunai emia'au hauna imana itipanai puka iouna weiana ea'ina.

⁸ Puka weiana ea'ina raninai mauri tabakia bani mai kiro haukia harau rua bani hanona

Mamoe nahu wairanai tekaipehu. Ia ha ha mai ekia kita atana hap abomo mai ekia gold puou puoukia aokiai muramura timikia 'orimokiai tebabonunakia, teba'aranakia timikia tehao, weiakia hanona Tirama ena robe maearimakia ekia bahuba'ari ai.

⁹ Weiana hui mahamahana ha tea'i taeana tehuaiaina tetibaha,

“Oi hanona mai emu bero
puka iouna koa'ina

abomo ikaiabuna hoahoakia
kobapa'anakia.

Pokina oi teahu 'arini'o,
ba emu 'ari aruarunai maearima
okawanakia Tirama 'euna,
itubu ikoikiai, maea ikoikiai,
maearima ikoikiai,
mai hano ikoikiai herekia.

¹⁰ Oi ohore obia 'arakia haukiai
mai robe akana tibabaina
haukiai obaonakia
eka Tirama ta'arana katea'i,
mai hanopaka katepoki aina.”

Ikoikiai Tirama Mai Mamoe Nahu Tekuti ainakia.

¹¹ Ba maha'u eao aneru bo'ona 'akina aihanakia mai aiakia aona, ia tehore obia imia'auna mai mauri tabakia bani mai kiro haukia tekori kaka-iaronakia, tebo'o ki'a baha taha taha.

¹² Tehui aota tetibaha,

“Mamoe nahu 'uainai
teahu 'arina hauna,
bariu mai ena bero,
hiabu, kepu, aobero,
mai tabura kea'inakia
abomo mariki, nuabi,

mai banamo kea'inakia.”

¹³ Ba mauri tabakia ikoikiai weiakia kupai, hanopakai, hanopaka ba'ana abomo 'akupakai mai aokiai temiaho haukia ikoikiai aiakia aona tehui tetibaha,

“Obia imia'auna ahanai emia'au Tiramana abomo Mamoe nahu herekiai banamo, mariki, nuabi, mai hiabu katemiaho, bariu keaomo banaibanai.”

¹⁴ Weiana mauri tabakia bani te'abi tetibaha, “Amen.” Ba kiro haukia tekaipehu ia tekuti aina.

6

Mamoe Nahu Puka Ikaiabu Hoakia 'Abaihau Ea'i Obonakia.

¹ Epuia Mamoe nahu aihana, puka iouna ahanai ikaiabu hoakia 'abaihau hamona hauna ea'ina, ia ehore ikaiabu hoana kori'uaina ea'i obona. Ba mauri tabakia bani 'abakia ha aiana aona, matoha kupa niro'u 'abana, e'abi etibaha, “Omai.”

² Maha'u eao hanona waira'uai hoti porena ha aihana, ba ahanai emia'au hauna hanona hunu ha imanai ea'ina, obia ibau'una ha tebena, ba hotiai ebeau ahi, ihaihana matoha arawai hauna, ia ehore 'ou haukia eba 'ehonakia, haeamona mai hiabuna niao bo'ona keba'ehonakia.

³ Mamoe nahu ikaiabu hoana ibaruana ea'i obona raninai mauri tabana ibaruana aiana aona, e'abi etibaha, “Omai.”

⁴ Ba hoti ha ekarahi hauna hanona ebiro. Ahanai emia'au hauna hanona hiabu tebena baibua hanopakai kea'i parena, weiana maearima kipokia 'abakia kateahuahu 'arinakia. Ia hanona kareba apa'uana ha tebena.

⁵ Ba Mamoe nahu ikaiabu hoana ibaihauna ea'i obona raninai, mauri tabana ibaihauna aiana aona, e'abi etibaha, "Omai." Ba maha'u eao hanona hoti 'umu obona ha aihana, ahanai emia'au hauna hanona puma ihobokia tabana ha imanai ea'ina.

⁶ Ba matoha aia ha 'abana mauri tabakia bani baiatakiai aona, e'abi etibaha, "Moao emu aka mobabaina, arobo rarina kerama. Weiana maearima wapu hamona niaka monina nia'ina hanona witi kaputi hamona kekawana, mai maearima wapu hamona niaka monina nia'ina hanona aniani atana bali kaputi aihau kekawanakia, iamo olibe matiukia mai bine harukia a'i koa'i ki'anakia."

⁷ Ba Mamoe nahu ikaiabu hoana ibabanina ea'i obona raninai, mauri tabana ibabanina aiana aona, e'abi etibaha, "Omai."

⁸ Maha'u eao hanona hoti hauna a'aeabuna ha aihana, ahanai emia'au hauna atana hanona 'Ari, mai 'ari haukia ekia 'eka hanona ia murinai ni'au. Hiabu hanona terarua tebenakia, ba hanopaka maearimakia iwate paipa bani aonai paipa ha hanona kateahu 'arinakia, maearima weiakia hanona huari aonai karebai kate'ari, arobo aonai mare'a ai kate'ari, inawai kate'ari, mai hanopaka ena ahuahu mahikiai kate'ari.

⁹ Mamoe nahu ikaiabu hoana ibaimana ea'i obona raninai, maha'u eao itara robena ba'anai Tirama ena 'abi buonai mai ena 'abi ihina pouna paunai teahu 'arinakia haukia aubakia aihanakia.

¹⁰ Ia hanona teio aota tetibaha, "Taba ikoikiai Obiapakana e, oi hanona orobe mai toha tohana, rani tabanai hanopaka haukia kobakainakia,

puma kobahoainakia emai 'ari aruarumai paunai?"

¹¹ Weiana habuni homa'akia pore obokia ha ha tebenakia, ba ehina benakia katebai'ima rani papana kehoma'a 'apua keaomo 'abakia ta'ara'i haukia mai uaho'abakia Keriso ena aka tibabaina haukia iahu'arikiai ia teahu 'arinakia ihobona, weiana ituabikia ranina ketaina.

¹² Ba Mamoe nahu aihana ikaiabu hoana iba'abaihauna ea'i obona raninai, kanokau rarina eka'a hano eibiu ki'a, beraura ewapura habuni 'umuna 'abana, haeamona nawa hanona ebiro aruaru 'abanai eao,

¹³ mai bihiu kupai te'eho hanopaka ahanai matoha baura rarina eabu'au 'ororo buabuana a'i te'aiba haukia eba'ehonakia 'abana.

¹⁴ Kupa abonamo e'akauma matoha 'ire teouna 'abana, haeamona oeo mai kereibua ikoikiai 'ekakiai teibiu.

¹⁵ Ba hanopaka ena obia 'arana haukia, obia haukia, huari poki haukia, kepu haukia, hiabu haukia, ta'ara'i haukia, haeamona ta'ara a'i tia'i haukia ikoikiai hanona oeo urikia aokiai mai oeo piharakia baiatakiyai tepihi.

¹⁶ Ia tehore oeo mai pihara apa'uakia teaparinakia tetibaha, "Tomo'eho tomobahu abunamai, obia imia'auna ahanai nemia'au Hauna wairanai mai Mamoe nahu ena opuere herekiyai tomoba buninamai.

¹⁷ Pokina ekia opuere wapuna apa'uana aba ekara'au. Tai he kekoroti?"

7

Tirama Ena Ta'ara'i Haukia 144,000 Paukia Ahakiai Mani'a Tea'ina.

¹ Weiana murinai aneru bani aihanakia, hanopaka 'uni puakia bani tekori abunakia, hanopaka ena baura bani tehe abunakia, baura ha a'i keabu hano ai 'ao 'aku 'ao matiu a'i keabunakia.

² Ba aneru haeai ha aihana, taetana tainai ekara'au mai mauri Tiramana ena taba ha ea'ina weianai tabakia kebamani'anakia Tirama 'euna. Weiana eio aota aneru bani weiakia Tirama ehore hiabu ebenakia hanopaka mai akupaka katea'i ki'anakia haukia ehina benakia etibaha,

³ “Wai hanopaka mai 'akupaka abomo matiu a'i katoa'i ki'anakia keaomo eka Tirama ena ta'ara'i haukia paukia ahakiai mani'a ha katahore 'auna.”

⁴ Weiana tebamani'ana haukiai ekia bo'o tetu-abina aiakia aona hanona taha ikoinai hinabu hamomo bariabui bani (144,000), ia hanona Is-araela itubukia harauhaea rua herekiai tekarahi.

⁵ Paukia ahakiai tebamani'anakia haukia, Iuda itubunai hanona taha harauhaea rua (12,000).

Ruben itubunai hanona taha harauhaea rua (12,000).

Gad itubunai hanona taha harauhaea rua (12,000).

⁶ Asere itubunai hanona taha harauhaea rua (12,000).

Napatali itubunai hanona taha harauhaea rua (12,000).

Manase itubunai hanona taha harauhaea rua (12,000).

⁷ Simeona itubunai hanona taha harauhaea rua (12,000).

Lebi itubunai hanona taha harauhaea rua (12,000).

Isakara itubunai hanona taha harauhaea rua (12,000).

⁸ Sebuluna itubunai hanona taha harauhaea rua (12,000).

Iosepa itubunai hanona taha harauhaea rua (12,000).

Mai Beniamina itubunai hanona taha harauhaea rua (12,000).

Maearima To'una Rarina 'Akina Mai Ekia Habuni Porekia Tirama Tekuti aina.

⁹ Taba neiakia murikiai maha'u eao maearima to'una rarina 'akina aihana pahatuabinakia a'i petaina, ia hanona hano haeai haeai, itubu haeai haeai, rama haeai haeai, mai maea haeai haeai ikoikiai aokiai tekarahi, ia ikoikiai hanona obia imia'auna wairanai mai Mamoe nahu wairanai tekoroti, ekia habuni hanona tehoma'a tepore obo, abomo imakiai hanona matiu raukia matoha tona 'ari'arina 'abakia tea'inakia.

¹⁰ Ba teio aota tetibaha,
 “Bamauri hanona aika eka Tirama obia imia'aunai nemia'au Hauna mai Mamoe nahu herekiai nimai.”

¹¹ Weiana aneru ikoikiai weiakia obia imia'auna, kiro haukia, mai mauri tabakia bani tekori kakaiaronakia haukia tehore obia imia'auna wairanai tekaipehu wairakia hano teao Tirama tekuti aina,

¹² tetibaha,
 “Amen.
 Banamo, mai nuabi,
 mai aobero, mai namo 'abina,
 mariki, mai hiabu, mai tabura
 hanona eka Tirama 'euna keaomo
 banaibanai.
 Amen.”

¹³ Weiana kiro hauna ha ebakaina'u etibaha, “Habuni homa'akia pore obokia tebatotonakia haukia hanona tai? Abomo ae'eai temai?”

¹⁴ Au ena 'abi abamuena atibaha, “Hau apa'uana e, oi o'iohina.” Haeamona ehina bena'u etibaha, “Neiakia hanona hau haiara apa'uakia aokiai tekabanai harai temai haukia, ekia habuni hanona Mamoe nahu aruarunai teutunakia ba tebaporenakia.

¹⁵ Ua buonai, Ia hanona Tirama ena obia imia'auna wairanai tikoroti, abomo ena marea robe aonai ia ena aka tibabaina rabi mai mararani.

Ba obia imia'auna ahanai nemia'au Tiramana kehore ekia i'auai keao ke'aeanakia mai ke'abanakia.

¹⁶ Ia hanona mare'a a'i kate'ari mue, 'akokia a'i kate'ororo mue.

Beraura 'ao hiabu haeai ha ia haukia a'i ke-bapetanakia.

¹⁷ Pokina Mamoe nahu obia imia'auna ibuana tohanai nemiaho hauna kehore ke'imanakia mamoe i'imana hauna 'abana,

ia kehore ke'uai ainakia mauri beina 'uriai nebuti hauna herenai,

ba Tirama kehore mahakia beikia ikoikiai mahakiai keutu 'ororonakia.”

8

Puka Ikaiabu Hoana Iba'abaihau Hamomona Ea'i Obona. Aneru Ha Mai Gold Urona.

¹ Ba Mamoe nahu Puka ikaiabu hoana iba'abaihau hamomona ea'i obona raninai, kupai 'uru ha a'i ebua 'apua eaomo beraura hoana abirana ha 'abana.

² Weiana Tirama wairanai tikoroti anerukia 'abaihau hamomo aihanakia, ba pihi 'abaihau hamomo aneru weiakia tebenakia.

³ Aneru haeai ha emai itara robena herenai ekoroti. Imanai hanona gold urona ha ea'ina aonai muramura timina 'orimona tekinena hauna. Ba muramura timina 'orimona bo'ona tebena mai Tirama ena robe haukia ikoikiaki ekia bahuba'ari kipokia keba haeamonakia gold itarana robena weiana obia imia'auna wairanai hauna ahanai keberuberu ainakia.

⁴ Weiana aneru imanai muramura timina 'orimona ni'ara hiabuna mai robe haukia ekia bahuba'ari kipokia tekara'au Tirama wairanai.

⁵ Ba aneru ehore uro weiana ea'ina, aonai itara robena irubanai ebonuna, ba hanopakai ekapo'auna hanona kupa ero'u mai e'imare, 'uru rarikia tehua, mai hano ekaukau.

Aneru Bani Ekia Pihi Teubaina.

⁶ Ba aneru 'abaihau hamomo weiakia teba'oru ekia pihi kate ubainakia.

⁷ Aneru kori'uaina ehore ena pihi eubaina, weiana abara pihara 'abakia mai iruba aruaru kipokia teba hamomo te'eho hanopaka ahanai abara netibo 'abana. Rani weianai hanopaka iwate paipa aihau aonai paipa ha e'ara obo mai matiu ikoinai iwate paipa aihau aonai paipa ha e'ara ore, haeamona tubu ikoinai te'ara ore.

⁸ Aneru ibaruana ehore ena pihi eubaina, weiana taba ha ihana matoha oeo apa'uana ha 'abana mai irubana 'akuai tekapo uhuna. Weiana 'akupaka iwate paipana aihau aonai paipa ha hanona aruaruai eao,

9 ba 'aku aonai mauri tabakia iwate paipana aihau aonai paipa ha hanona te'ari, mai aunohi ikoikiai iwate paipa aihau aonai paipa ha hanona tepururu.

10 Aneru ibaihauna ehore ena pihi eubaina, weiana bihiu apa'uana ha ni'ara matoha toti 'abana kupai e'eho, ba ate ikoikiai iwate paipa aihau aonai paipa ha mai bei ekia buti 'ekakia ahakiai e'eho.

11 Bihiu weiana atana hanona 'Mabi'. Ba bei ikoikiai iwate paipa aihau aonai paipa ha hanona temabi ki'a. Ba maearima bo'ona bei weiana teinu hanona te'ari, pokina bei aba emabi.

12 Aneru ibabanina ehore ena pihi eubaina, weiana beraura iwate paipana aihau aonai paipa ha, mai nawa iwate paipana aihau aonai paipa ha, haeamona bihiu ikoikiai iwate paipa aihau aonai paipa ha tepoanakia, weiana ea iwate paipana aihau aonai paipa ha hanona ewapura, ba mararani iwate paipana aihau aonai paipa ha, mai rabi iwate paipana aihau aonai paipa ha hanona a'i ea.

13 Ba po'i ha aihana kupa baiatanai erobo, aiana aona eio aota etibaha, "Keki'a, keki'a. Hanopaka ahanai temiaho haukia ikoikiai herekiai hanona keki'a ki'a bahana, pokina aneru haeai aihau ekia pihi aba kateubainakia."

9

Aneru Ibaimana Ena Pihi Eubaina.

1 Weiana aneru ibaimana ehore ena pihi eubaina, ba au bihiu ha aihana kupai aba e'eho

hanopakai, bihiu weiana hanona 'uri 'ourana 'akina a'ena aha'i hauna kina tebena.

² Ba bihiu weiana ehore 'uri 'ourana ekaikauna, weiana 'uriai hiabu 'umuna ekara'au matoha iruba rarina 'akina hiabuna nikara'au 'abana. Weiana 'uri hiabuna ekara'au beraura mai kupa ebawapuranakia.

³ Weiana hiabu aonai pekau tekarahi teriri hanopaka ahanai, ia hanona hiabu ebenakia matoha hara nikainaka nahahaiara 'abana.

⁴ Iamo ehina benakia hano tubuna abomo 'anoai tiomu tabakia mai matiu ha a'i katea'i ki'a, 'a maearima weiakia paukia ahakiai Tirama ena mani'a aha'i haukia mo katea'i ki'anakia.

⁵ Ia pekau ehina benakia maearima a'i kateahu 'arinakia, iamo kateba haiaranakia weiana nawa ima aonai katehaiara ihobona hara nikainaka ena haiara 'abana.

⁶ Wapu weiakia aokiai maearima hanona 'ari katetabuna iamo a'i katetabu ahina, katenuatae ki'a baha pate'ari iamo 'ari hanona ia herekiai kebeau pare.

⁷ Pekau weiakia ihaihakia hanona matoha huari hotikia 'abakia teba'orunakia huari kateao, arakiai hanona taba ha tebau'una matoha obia ibau'una gold ai tebabaina 'abana, wairakia hanona matoha maearima wairakia 'abana.

⁸ Buikia hanona matoha babi'e buikia homa'akia 'abana, nihekia hanona matoha mahi atana laiona nihekia 'abana.

⁹ Haharakiai hanona auri panabanai te'aeanakia, ia banikia 'urukia hanona matoha hoti bo'ona 'akina mai kori'au tabakia atakia kariota hotiai teberinakia tebeau huari tiao 'urukia 'abana.

10 A'arekia hanona mai 'inikia matoha hara a'arekia 'abakia, mai a'arekia aokiai hanona mai ekia hiabu maearima nawa ima kateba ha-iaranakia.

11 Ia hanona mai ekia obia 'arana ha, 'uri 'ourana weiana aneruna, ia atana Heberu maeakiai hanona Abadon, 'a Helene maeakiai atana Apoluona, anina hanona Bapururu hauna.

12 Atetua ki'a obona kori'uaina aba eore, murinai haeamona atetua ki'a obokia rua naha'imanakia katemai.

Aneru Iba'abaihauna Ena Pihī Eubaina.

13 Aneru iba'abaihauna ehore ena pihī eubaina, ba aia ha aona 'uruna hanona Tirama wairanai itara robena gold ai tebabaina haunai 'ea bani herekiai weia ekarahi.

14 Aia weiana ehore aneru iba'abaihauna pihī ea'ina hauna ehina bena etibaha, “Aneru bani weiakia Efarate ate apa'uana haiantai aba tebirinakia haukia korubu ta'inakia.”

15 Ba aneru weiakia bani terubunakia, anerukia weiakia hanona aba teba'oru tibai'ima ihau weiana aonai nawa weiana aonai wapu weiana aonai beraura hoana weianai katekarahi hanopaka maearimakia iwate paipana aihau aonai paipa ha kateahu 'arinakia.

16 Aneru bani weiakia ekia huari haukia mai hotikia tetuabinakia aiakia aona hanona ikoinai kerepu hinabu rua 'abana.

17 Weiana e'u mahabanai ai, hotikia mai huari haukia weiakia hotikia ahakiai temia'au haukia aihanakia, haharakia i'aeakia hanona tebiro, matoha iruba, tepurutoni, mai tea'aeabu, 'a hoti arakia hanona matoha mahi atana laiona arakia

'abana, abomo pinakiai iruba, hiabu, mai pihara atakia salpa mai irubakia tekarahi.

¹⁸ Taba ki'a obokia aihau weiakia hoti pinakiai tikarahi haukia tehore hanopaka maearimakia iwate paipana aihau aonai paipa ha teahu 'arinakia, taba weiakia hanona iruba, hiabu, mai pihara atakia salpa.

¹⁹ Pokina hoti ekia hiabu hanona pinakia ai mai a'arekia ai temiaho, a'arekia hanona matoha 'erau 'abana mai arakia ba weianai maearima tea'i ki'anakia.

²⁰ Maearima harina taba ki'a obokia aihau neiakiai a'i te'ari haukia hanona a'i teraona kabe baha, imakiai tebabainakia tabakia a'i temurinakia, auba ki'a obokia ikutiakia a'i teba puanakia, kaiba'uku weiakia gold, silba, kopa, pihara, mai matiu ai tebabainakia haukia, weiakia a'i teihaiha, aia a'i tio'o, a'i tika'a tabakia ikutiakia a'i tehabona.

²¹ Ekia ahuahau hoakiai, ekia nepu hoakiai, ekia nabau hoahoakia ki'a obokiai, mai ekia bainao hoahoakiai a'i teraona kabe 'apua.

10

Aneru Ha Mai Puka Iouna Papana Ha.

¹ Weiana aneru taburana ha aihana kupai eriri nimai hauanina 'auhao ai ero'abuna, arana ubinai hanona 'opa, wairana hanona ea matoha beraura, ia aena ihakia hanona matoha iruba bero berokia 'abakia.

² Imanai hanona puka iouna papana ha aba ikaikau hauna ea'ina. Aena itipana hanona 'aku ahanai ehe'au ia awarina hanona hanopaka ahanai ehe'au.

³ Aneru weiana eio aota matoha mahi atana laiona ni'arara 'abana. Ba eio raninai, kupa rani 'abaihau hamomo ero'u, ro'u ha ha 'abi tehinana.

⁴ Ba ro'u 'abaihau hamomo te'abi'abi nonoa hanona aiakia karerena nahoma, iamo aia ha kupai emai aona etibaha, “Ro'u 'abaihau hamomo te'abi hauna kobunina, a'i korerenakia.”

⁵ Weiana aneru aihana hauna 'aku ahanai mai hanopaka ahanai ekoroti hauna ehore imana itipana etiu taeana kupa.

⁶ Ba aneru weiana ehore miaho banaibanai Tiramana weiana kupa mai aona tabakia ikoinai mai hanopaka mai aona tabakia ikoinai mai akupaka mai aona tabakia ikoinai ebabainakia Tiramana atanai e'abi 'uai etibaha, “Rani hanona aba keore, Tirama hanona a'i kebai'ima homa'ana.

⁷ Iamo aneru iba'abaihau hamomona ena pihi keubaina raninai, Tirama ena raona bunina hanona ketohana, Pou namona neiana hanona ena mahabanai haukia ia ta'arana tea'i haukia ehina benakia.”

Ioane Puka Iouna Papana Eana.

⁸ Ba aia weiana kupai ao 'uaina hauna haeamona ehinabe muena'u etibaha, “Moao aneru weiana 'akupakai mai hanopakai ekoroti hauna imanai puka iouna weiana ekaikau hauna koa'ina.”

⁹ Ua buonai aeao aneru weiana herena ba anoina puka iouna papana weiana kebena'u. Ba ia au ehina bena'u etibaha, “Moa'ina moana mo'orumuai hanona kemabi, 'a pinamuai hanona kekuma kuma matoha hoho beina 'abana.”

¹⁰ Ba aneru imanai puka iouna papana weiana a'ina ani obona, weiana pina'uai hanona ekuma

kuma matoha hoho beina 'abana, iamo ani obona murinai mo'oru'uai hanona emabi.

¹¹ Ba ehina bena'u etibaha, “Oi hanona mahabanai 'abina kohina muena, weiana maearima haeai haeai, hano haeai haeai, maea haeai haeai, mai obia, arakia haeai haeai haukia robakia koahuna.”

11

Pou Hina Haukia Rua.

¹ Epua, hiribo ha matoha ikai'ini 'abana ebena'u ba ehina bena'u etibaha, “Omikiri, Tirama ena marea robe mai itara robena kohobonakia, abomo aonai maearima tibahuba'ari haukia kotuabinakia.

² 'A marea robe ara aonai ena i'aea huri 'ekana atapakai hauna hanona a'i kohobona, pokina Tirama ena maearima aha'i haukia aba ebenakia ia hanona nawa bariabui rua aiara robena katehe hai ehe haina.

³ Iamo au pou'u ihinana haukia rua hiabu kabenakia, pute habunikia weiakia aoko'o katebaiha baihaina haukia katebatotonakia, weiana wapu taha hamomo hinabu rua imabui harau haea (1,260) weia mahabanai 'abina katehinana.”

⁴ Neiakia hanona olibe matiukia rua mai ramepa rua hanopaka ikoinai Obiapakana wairanai tekoroti haukia.

⁵ Ba hau ha kenuatae terarua kea'i ki'akia raninai, terarua pinakiai iruba katekarahi weiakia ekia 'ou haukia keahu 'ari orenakia, weiana maearima tabana ia'i ki'akia kenuatae aina hanona ia abomo ua ke'ari aiho.

⁶ Ia terarua hanona mai hiabukia kupa katekiabuna, weiana ekia mahabanai 'abina ihinana beraurakia aokiai hanona abara a'i ketibo.

Abomo mai hiabukia bei 'aki katebahaeaina aru-
 aruai keao, weiana katenuatae raninai atetua
 ibaramana akakia haeai haeai hanopakai kateba
 ramanakia.

⁷ Ekia pou hina 'abina weiana katebaorena
 kepua murinai, aiahu mahina weiana 'uri e'oura
 ki'a aonai kekara'au hauna kehore terarua ke-
 huari benakia keahunakia keahu 'arinakia.

⁸ Weiana terarua te'ari hauanikia hanona
 aiara apa'uana Ierusalemairabuanai katenoti.
 Weiana hanona terarua ekia Obiapaka matiu
 ibiri ropo ubinai e'ari 'ekana, aiara weiana 'abi
 ibabatainai atana tehinana, Sodoma 'ao Aikupito.

⁹ Wapu aihau mai abirana ha aonai maearima
 haeai haeai, itubu haeai haeai, maea haeai
 haeai, mai hano haeai haeai haukia katemai
 'ari hauanikia weiakia rua kateihanakia, iamo
 katehina benakia a'i kate horenakia.

¹⁰ Hanopaka haukia hanona hau rua ekia 'ari
 paunai kateamonamo ki'a baha, abomo maearima
 ha ha beruberu tabakia katebaibeni, pokina ma-
 habanai haukia weiakia rua tehore hanopaka
 haukia tebahaiara ki'anakia.

¹¹ Iamo wapu aihau mai abirana ha weiakia
 teore murinai, mauri nibaibeni maeabuna
 Tirama herenai emai terarua aokiai etoto,
 weiana temikiri tekoroti. Ua'a teihanakia haukia
 ikoikia hanona teta'u ki'a.

¹² Ba aia apa'uana ha kupai emai teona, eapari
 etibaha, "Tomokara'au tomai neia." Weiana ter-
 arua hanona i'oatakia haukia wairakiai 'auhao ha
 aonai tekara'au teao kupa.

¹³ Beraura hoana weianai kanokau apa'uana
 ha eka'a, weiana aiara apa'uana iwate
 paipana harau haea aonai paipa ha maikoina

hanona ebapururuna, abomo kanokau ehore maearima ikoinai taha 'abaihau hamomo (7,000) eba'arinakia. Maearima harina weiakia a'i te'ari haukia hanona teta'u ki'a baha, kupa Tiramana atana tea'i taeana.

¹⁴ Weiana hanona atetua ki'a obona ibaruana, aba ekapo raina. Iamo tomobahu, atetua ki'a obona ibaihauna hanona aba kemai.

Aneru Iba'abaihau Hamomona Ena Pihī Eubaina.

¹⁵ Epuā, aneru iba'abaihau hamomona ehore ena pihī eubaina. Weiana aia apa'uakia kupai te'abi tetibaha,

“Hanopaka ipokiaina hiabuna
hanona aba eka Obiapaka
mai ena Keriso 'eukiai eao.
Ia hanona obia 'aranai eao
hanopaka kepoki aina
keaomo banaibanai.”

¹⁶ Weiana kiro haukia haraurua bani Tirama wairanai ekia obia imia'aukia temia'au haukia te'umuti tekuti Tirama tebanamona tetibaha,

¹⁷ “Obiapaka

Hiabu ikoinai Tiramana e,
oi nomiaho mai 'uainai omiaho.
Ai tahore namo 'abina tabeni'o.
Pokina emu hiabu apa'uana
aba oa'ina.

Emu obia aiarana nupoki aina.

¹⁸ Hano haeai haukia teopuere,
iamo oi emu opuere
ranina ekara'au.
Ba aba te'ari haukia
oi emu bakai aonai
katewaira tina kobabakainakia

ranina aba ekara'au.
 Emu ta'ara'i haukia
 weiakia mahabanai haukia,
 mai emu maearima robekia,
 mai oi atamu timariki aina
 haukia papakia eaomo apa'uakiai
 epua, ikoikiai 'arabia
 namokia kobenakia
 ranina aba ekara'au.
 Abomo hanopaka tea'i ki'ana
 haukia kobapururunakia
 ranina aba ekara'au.”

¹⁹ Weiana murinai aneru Tirama ena marea robe kupai hauna tekaikauna, ba ena rauhuhu mauana marea robe aonai hauna aihana. Weiana kupa te'imare, 'uru rarikia tebua, kupa ero'u, kanokau eka'a, mai abara etibo pihara 'abakia.

12

Babi'e Ha Mai Mahi Ha Atana Dragona.

¹ Epua, hoa apa'uana ha kupai ewaira tina. Babi'e ha ena habuni ibatoto hanona beraura, mai nawa hanona ia 'apuna ba'akiai, mai bihiu harauhaea rua hanona ena obia ibau'unai temiaho aranai ebau'una.

² Ia hanona mai nuana ba mai haiarana nihai ihobona aba kemaui.

³ Ba hoa haeai mo ha kupai ewaira tina. Mahi ha weia atana dragona 'erau 'abana rarina 'akina birona weia 'arana ikoinai 'abaihau hamomo, 'arana ha ha ahakiai hanona obia ibau'ukia, haeamona 'eana hanona ikoinai harau haea.

⁴ A'arenai kupa bihiukia iwate paipana aihau aonai paipa ha kupai etaro ahinakia hanopakai ekapo 'aunakia.

Mahi weiana hanona babi'e aba kemaui hauna wairanai ekoroti, nibai'ima babi'e miori kebaramana hanona keana.

⁵ Ba babi'e emauri nahuna hanona hau papana, miori weiana hanona hanopaka maearimakia ikoikiai auri ikai'ininai kepoki ainakia, ba miori hanona tea'i parena teaoaina Tirama herena mai ena obia imia'aunai.

⁶ Babi'e hanona ebeau 'akaumana eao hano'akunai, Tirama 'eka ha aba eba'oruna ia 'euna, weia ia kateiha 'inina keao wapu ikoinai taha hamomo hinabu rua imabui harau haea (1,260).

⁷ Epuia kupai huari erama, Mikaela mai ena aneru kipokia mahi atana dragona tehuarina, mahi weiana ena aneru kipokia tehore Mikaela tehuarina.

⁸ Iamo mahi ena tabura hanona a'i etaina, ba ekia 'eka kupai hauna teba'akaumana.

⁹ Mahi rarina 'akina weiana hauna kupai tekapo ahina. (Ia hanona 'erau 'ai'aina weiana atana hanona Tiaporo 'ao Satani, hanopaka maikoina ni'oi ahina hauna.) Ia hanona tekapo ahina eriri hanopakai mai ena aneru kipokia.

¹⁰ Ba aia ha rarina 'akina kupai aona e'abi etibaha,

“Bariu eka Tirama ena bamaui,
ena hiabu, mai ena obia aiarana,
mai Keriso ena hiabu hanona
aba tewaira tina,
pokina uaho'abaka ekaiahinakia

hauna, weiana rabi mai mararani
Tirama wairanai ekaiahinakia
hauna hanona aba tekapo ahina.

¹¹ Uaho'abaka tehore Mamoe nahu
ena 'ari aruarunai mai
'abi tohana ihinana paukia
tiaporo weiana teahu parena.
Ia kipokia ekia mauri hanona
a'i teraona'au aina
iamo tenuatae kate'ari.

¹² Ua buonai tomoaoanamo ki'a,
wai kupa mai kupai
tomiaho haumi.

Iamo wai hanopaka
mai 'akupaka heremiai
hanona keki'a ki'a baha,
pokina Tiaporo hanona
aba eriri ewahi heremi,
niopuere ki'a baha,
pokina e'jobina ena rani hanona
aba eko'o ko'o."

¹³ Dragona weiana e'jobina ia hanona aba
tekapo ahina eriri hanopakai hanona ia ehore
babi'e weiana miori ebaramana hauna ebatetu-
ana.

¹⁴ 'A babi'e hanona po'i apa'uana ha ban-
ina rua tebena, weiana ia kehore kerobo keao
hano'akuna ena 'eka ha, aba teba'oruna weia
kateiha 'inina ihau aihau mai abirana ha aonai,
'erau weiana ia a'i ketabu ahina.

¹⁵ Ba 'erau weiana pinanai hanona bei emama
ahina matoha ate 'abana weiana babi'e murinai
earu eao kearu 'akaumana.

¹⁶ Iamo hanopaka ehore babi'e ebaraina,
hanopaka pinana ekaikauna tou beina weiana

dragona pinanai earu emai hauna maikoinai etono 'au orena.

¹⁷ Dragona hanona babi'e eopuereai ki'ana, ba eao babi'e nahuna ikoikiai kehuarinakia. (Weiakia hanona Tirama ena rauhuhu 'abikia tika'aina haukia mai Iesu ehina pounakia 'abikia tia'i taeana haukia.)

13

Aiahu Mahikia Rua Tekara'au.

¹ Epuā, maha'u eao hanona aiahu mahina ha 'akuai ekara'au aihana. Ia hanona 'eana harau haea mai 'arana 'abaihu hamomo, ba 'eana korikiai hanona mai ekia obia ibau'ukia harau haea, 'ara ha ha ahakiai hanona Tirama ibaki'ana 'abikia atakiai tererenakia.

² Aiahu mahina weiana aihana ihana hanona matoha puti 'aki apa'uana atana taiga 'abana aena ihakia hanona matoha mahi atana bea aena 'abana, mai pinana ihana matoha mahi atana laiona pinana 'abana. Ba mahi weiana atana dragona hauna ehore kipona ena tabura, mai ena obia imia'auna, mai hiabu apa'uana aiahu mahina weiana ebena.

³ Aiahu mahina weiana aihana 'arana ha hanona matoha imoai e'ari 'abana iamo imoa weiana haeamona enamo, ba hanopaka maikoinai teta'uta'u huri mahi murinai teka'a.

⁴ Maearima dragona tekuti aina, pokina ia ehore ena hiabu aiahu mahina ebena, abomo aiahu mahina tekuti aina, te'abi tetibaha, "Tai hanona aiahu mahina neiana 'abana? Tai mai ena tabura ia kehuarina?"

5 Aiahu mahina hanona bero tebena apa 'abikia, mai Tirama ibaki'ana 'abikia kehina, hi-abu tebena nawa bariabui rua aokiai hoahoa weiana kebabaina.

6 Pinana ekaikauna Tirama ibaki'ana 'abikia ehina, mai atana abomo e'abi ki'a bena, Tirama ena miaho 'ekana mai weiakia kupai temiaho haukia ikoikiai abomo e'abi ki'a benakia.

7 Ia hanona hiabu tebena Tirama ena robe haukia kehuarinakia keahunakia, ba bero tebena itubu ikoikiai, maearima ikoikiai, maea ikoikiai abomo hano maikoinai kepoki ainakia.

8 Maearima ikoikiai hanopaka ahanai temiaho haukia, weiakia Tirama hanopaka ebakorina murinai atakia Mamoe nahu ena mauri pukanai a'i tererena haukia ikoikiai hanona aiahu mahina weiana katekuti aina. Mauri pukana weiana hanona Mamoe nahu 'uainai teahu 'arina hauna 'euna.

9 Mai haiana hauna kehore aia neiana keona.

10 Tirama nenuatae hau ha katea'ina katebawapurana raninai, hau weiana hanona katea'ina katebawapurana.

Haeamona Tirama nenuatae hau ha akiuai ke'ari raninai, hau weiana hanona akiuai kateharana ba ke'ari.

Neiana buonai Tirama ena robe maearimakia hanona bakiroai mai a'ikakaumai katemiaho.

11 Epuu, aiahu mahina haeai ha aihana, hano aonai ekara'au, 'eana hanona rua matoha mamoe nahu 'abana, ia e'abi aiana hanona matoha mahi atana dragona 'abana.

12 Ia hanona aiahu mahina weiana kori'uaina hauna herenai emiaho ena hiabu ihobonai eaka, hiabu neianai hanopaka mai temiaho aina maearimana ikoikiai ebahi ahinakia mahi kori'uaina weiana 'aranai imoa enamo hauna katekuti aina.

13 Aiahu mahina ibaruana ehore bata'uta'u huri akakia apa'uakia ebabainakia, ha hanona maearima ikoikiai wairakia tohanai iruba weia kupai euhu ririna emai hanopakai.

14 Pokina bero ea'ina bata'uta'u huri akakia weiakia aiahu mahina kori'uaina herenai emiaho aonai ebabainakia haukiai hanopaka haukia e'oinakia. Aiahu mahina ibaruana ehore hanopaka maearimakia ebahi ahinakia kaiba'uku ha katebabaina aiahu mahina kori'uaina imarikiaina paunai, weiana akiuai imoa ea'ina ba emauri mue hauna.

15 Aiahu mahina ibaruana hauna bero ea'ina, kaiba'uku weiana mauri maeabuna ebena ke'abi'abi, mai hiabu ebena kaiba'uku kehore maearima kehina benakia weiakia kaiba'uku a'i katekuti aina haukia ikoikiai kateahu 'arinakia.

16 Haeamona aiahu mahina ibaruana ehore maearima ikoikiai ebahi ahinakia, papakia mai apa'uakia, obia huakia mai uraru haukia, ta'ara a'i tia'i haukia mai ta'ara tia'i haukia, ikoikiai hanona mani'a ha imakia itipanai 'ao paukia ahakiai katea'ina.

17 Maearima mani'a weiana a'i kea'ina hauna hanona taba ha a'i kekawana mai taba ha a'i kekawakawai 'apuana, mani'a weiana hanona aiahu mahina weiana atana 'ao atana irere itu-abina hauna.

18 Maearima mai ena aobero hauna ata ituabi neiana ke'jobina hanona ketaina, aobero hauna kehore aiahu mahina ata ituabina keraonana,

pokina tuabi tuabi neiana hanona maearima ha atana ituabina ihobona, tuabi tuabi neiana hanona hinabu 'abaihau imabui harau haea reana 'abaihau (666).

14

Mamoe Nahu Ena Maearima Hui Mahamahana Tea'ina.

¹ Epuā, maha'u eao hanona mamoe nahu aihana, Siona Oeona ahanai ekoroti, herenai hanona maearima ikoinai taha ikoinai hinabu hamomo bariabui bani (144,000) weiakia paukia ahakiai ia atana mai Hamana atana tererenakia haukia.

² Ba 'uru namona ha aona kupai emai, 'uruna matoha ate bo'okia tiaru mai kupa niro'u 'uruna 'abana. 'Uru weiana aona hanona matoha kita ahū haukia ekia kita atakia hap tipapura ainakia 'abana.

³ Ba maearima weiakia tehore Tirama ena obia imia'auna mai mauri tabakia bani mai kiro haukia wairakiai, hui mahamahana ha tea'ina. Tai ha hui weiana kemarere aina a'i ketaina ia weiakia haukia 144,000 hanopaka herenai arunarunai ekawanakia haukia mo te'iohina.

⁴ Maearima weiakia hanona babi'e kipokia a'i tenabau haukia, ekia mauri aonai hanona ki'a herenai te'abaea harai, ia Mamoe nahu aeana niao hanona murinai ti'au haukia, mai hanopaka maearimakia baiatakiai ia ekawanakia, mai baibeni tabakia kori'uaikiai teao Tirama mai Mamoe nahu herekiai.

⁵ Bai'oi 'abina ha pinakiai a'i tehina, ia hanona herekia beho aha'i.

Aneru Aihau Bakai Ranina Pouna Tehinana.

6 Epuā, aneru haeai ha kupa baiatanai erobo aihana, ia hanona Pou namona nemiaho banaibanai hauna ea'ina, weiana hanopakai temiaho haukia herekiai keiroro aina, hano ikoikiai, itubu ikoikiai, maea haeai haeai, mai maearima ikoikiai herekiai.

7 Ia ehore e'abi aota etibaha, “Tirama to-mota'u aina mai ia atana tomobanamona, pokina maearima ikoinai kebabakainakia ranina aba etaina, ia hanona kupa, hanopaka, 'akupaka, mai bei hanoai tebuti haukia ebabainakia hauna, tomokuti aina.”

8 Ba aneru ibaruana ha aneru kori'uaina murinai erobo, e'abi aota etibaha, “Aba e'eho! Babulonia aiara apa'uana, aba e'eho. Ia ehore ena biai hano ikoikiai maearimakia ebainu 'arinakia, bia weiana hanona ena maha porepore hoahoakia.”

9 Ba aneru ibaihauna ha aneru rua te'uai haukia murikiai erobo, e'abi aota etibaha, “Hau ha aiahu mahina mai ena kaiba'uku nekuti ainakia, mai ia pauna ahanai 'ao imana ahanai mahi ena mani'a nia'ina hauna,

10 ia abomo Tirama ena opuere wainina keinu, weiana Tirama ia keopuere aina puma keba-hoi ki'ana matoha waini weiana kaputi aonai aba teheina bei kipokia a'i tebahaeamona hauna 'abana. Ki'a hauna weiana hanona aneru robekia mai Mamoe nahu wairakiai kehaiara iruba mai pihara atana salpa mai irubana aokiai.

11 Iruba weianai tihaiara hiabuna hanona kekara'au to'ona keaomo banaibanai. Aiahu mahina weiana mai ena kaiba'uku tekuti aina haukia 'ao mahi atana mani'ana tea'ina haukia hanona ekia arai ranina ha aha'i, mararani mai rabi katehaiara mo.”

12 Neiana buonai Tirama ena robe haukia weiakia ena rauhuhu 'abikia tika'ainakia mai Iesu tia'ikakaumana haukia hanona bakiroai katemiaho.

13 Ba aia ha kupai aona e'abi etibaha, "Abi neiana morerena. Bariu keaomo wairai aonai weiakia Obiapaka aonai ti'ari haukia hanona tenamo." Auba Robe abomo e'abi etibaha, "Abi tohana, ekia aro'ariai katearai, pokina ekia hoahoa namokia katehore ia kate'abanakia."

Hanopaka Ena Ariari Ranina Ekara'au.

14 Epuia, maha'u eao hanona 'auhao ha porena waira'uai aihana, 'auhao weiana ahanai hanona hau ha ihana matoha Maearima nahuna 'abana emia'au, 'arana ahanai hanona obia ibau'una gold ai tebabaina hauna, ba imanai hanona iraburabu tabana ha nihena eara hauna ea'ina.

15 Ba aneru haeai ha marea robeai ekarahi emai ba 'auhao ahanai emia'au hauna eaparina aiana 'ubiai etibaha, "Emu iraburabu moa'ina moariari aina, pokina witi iarina ranina aba ekara'au, hanopaka witina hanona aba te'oru harai."

16 Ua buonai 'auhao ahanai emia'au hauna ehore ena iraburabu tabana eraburabu aina, ba witi hanopakai hauna maikoina earina.

17 Ba aneru haeai ha marea robe kupai hauna aonai ekarahi, ia abomo imanai iraburabu tabana ha nihena eara hauna ea'ina.

18 Haeamona aneru haeai ha weiana iruba nipoki aina hauna itara robenai emai ba aneru weiana imanai iraburabu nihena eara hauna ea'ina hauna eaparina, aiana 'ubiai etibaha, "Emu iraburabu moa'ina hanopaka ena bine

haharuanai bine buabuakia moarinakia, pokina hanopaka ena bine buabuakia hanona aba te'aiba harai.”

¹⁹ Ba aneru weiana ehore ena iraburabu tabana hanopaka ahanai eraburabu aina, hanopaka ena bine buabuakia ekabe hurinakia, eba raronakia ba ekapo utanakia bine buabuakia imutukia 'ekanai, weiana hanona Tirama ena opuere 'ekana.

²⁰ Ba aiara kapenai bine buabuakia imutuna 'ekanai temutunakia, ba imutu 'ekanai aruaru earu ahi, earu eao ena ro'e hanona hoti ekoroti pinana ihobona, 'a ena homa'a hanona kilometa hinabu aihau.

15

Aneru 'Abaihau Hamomo Ia'i Ki'akia Tabakia Orekia 'Abaihau Hamomo Tea'inakia.

¹ Epuu, au bata'uta'u huri hoana haeai ha apa'uana kupai aihana. Aneru 'abaihau hamomo imakiai hanona maearima ia'i ki'akia tabakia ki'a obokia 'abaihau hamomo tea'inakia, neiakia hanona orekia, murikiai hanona haeai ha a'i kerama, weiana Tirama ena opuere hanona keore.

² Haeamona maha'u eao taba ha aihana, ihana matoha 'akupaka weiana eiroro wairai ihobona karati mai irubana 'abana. Maearima weiakia aiahu mahina mai ena kaiba'uku mai atana irere ituabina hoana teahu parenakia haukia ikoikiai weia 'aku haianai tekoroti, Tirama kita atakia hap ebenakia hanona imakiai tea'inakia.

³ Ia hanona Mose weiana Tirama ena ta'ara'i hauna ena hui ha mai Mamoe nahu ena hui abomo ha tehuiaina tetibaha,

“Obiapaka
 hiabu ikoinai Tiramana e,
 emu aka teapa'ua ki'a baha,
 bata'uta'u huri akakia nubabai.
 Uru ikoikiaia ekia Obia 'arana e,
 emu taeara hanona tebero wairai
 abomo toha tohakia.

⁴ Obiapaka e,
 ikoikiaia hanona oi
 kateta'u aini'o, mai oi
 atamu katea'i taeana.
 Pokina oi ikupaiaamu
 hanona orobe.
 Hano ikoikiaia hanona katemai
 oi wairamuai katekuti aini'o.
 Pokina oi emu babai berokia
 hanona aba tewaira tina.”

⁵ Neiakia murikiaia maha'u eao kupai marea
 robe aihana ikaikau emiaho, weiana hanona
 Tirama ena rauhuhu emiaho paraboana.

⁶ Ba aneru 'abaihau hamomo aba teba'oru
 maearima ia'i ki'akia tabakia ki'a obokia 'abaihau
 hamomo katebabainakia haukia marea robeai
 tekarahi, habuni namokia tohakia atakia linen
 mai 'imare 'imarekia tebatotonakia, mai gold
 'apakia haharakiaia te'aberenakia.

⁷ Weiana mauri tabakia bani baiatakiaia ha
 ehore gold puoukia 'abaihau hamomo ea'inakia
 aneru 'abaihau hamomo weiakia ebenakia, puou
 weiakia aokiaia hanona Tirama weiana kemiaho
 banaibanai hauna ena opuere ebonu.

⁸ Ba Tirama ena nuabi mai ena hiabu paunai
 iruba hiabuna marea robe aonai ebonu 'auna,
 hau ha a'i kekatoto 'apua keaomo aneru 'abaihau
 hamomo weiakia katehore maearima ia'iki'akia

tabakia ki'a obokia 'abaihau hamomo katebaore harainakia.

16

Tirama Ena Opuere Puoukia 'Abaihau Hamomo Tebakiki Oioinakia.

¹ Epuā, aia ha marea robeai aona aneru 'abaihau hamomo ehinabe 'aotanakia etibaha, “Tomoao, Tirama ena opuere puoukia 'abaihau hamomo haukia katobakiki oioinakia hanopaka ahanai.”

² Ua buonai aneru kori'uaina eao ena puou hano ahanai ebakiki oina, ba tua ki'a obokia mai haiarakia maearima weiakia aiahu mahina ena mani'a tea'ina haukia mai ena kaiba'uku tekuti aina haukia ahakiai terama.

³ Aneru ibaruana ehore ena puou 'aku ahanai ebakiki oina, ba 'aku ebaebo matoha 'ari hauna aruaruna 'abana, ba taba weia 'aku aonai temiaho haukia ikoikiai te'ari.

⁴ Aneru ibaihauna ehore ena puou ate mai bei hanoai tebuti haukia ahakiai ebakiki oina, ba tebaebo aruaru ai teao.

⁵ Ba bei nipoki ainakia aneruna aiana aona e'abi etibaha,

“Robe Tiramana e,
oi nomiaho mai 'uainai
omiaho haumu,
emu bakai neiakiai ki'a haukia
puma obahoainakia hanona
obero ki'a baha.

⁶ Pokina ia tehore emu
robe haukia mai mahabanai haukia
teahu 'arinakia aruarukia
tebakiki oinakia,
ba oi ehore aruaru obenakia

kateinu hanona ekia ki'a
'arana obamuena.”

⁷ Ba aia ha itara robenai emai aona e'abi etibaha,
“E, 'abi tohana,

Obiapaka

hiabu ikoinai Tiramana e,
oi emu bakai weiana ki'a haukia
puma obahoainakia hanona tohakia mai tebero.”

⁸ Aneru ibabanina ehore ena puou beraura
ahanai ebakiki oina, ba beraura bero tebena
irubanai maearima keba'aranakia.

⁹ Hiabu rarina 'akina ehore maearima
eba'aranakia, ba Tirama weiana maearima
ia'iki'akia neiakia ebaramanakia hauna atana
teururu aina haeamona raona kabe a'i tenuatae
aina mai ia a'i tebanamona.

¹⁰ Aneru ibaimana ehore ena puou aiahu
mahina ena obia imia'auna ahanai ebakiki oina,
ba mahi weiana ena obia aiarana maikoina ewa-
pura abuna, weiana maearima tehaiara ki'a baha
paunai maeakia te'urinakia,

¹¹ mai ekia haiara mai ekia tua paukiai Tirama
weiana kupai nemiaho hauna teururu aina, mai
ekia aka ki'ai kateraona kabe hanona a'i tenuatae.

¹² Aneru iba'abaihauna ehore ena puou Eufrate
atena apa'uana ahanai ebakiki oina, ba ate beina
e'ororo 'au, taetana tainai obia 'arana haukia ekia
taeara eba'oruna katemai.

¹³ Ba auba ki'a obokia* aihau aihanakia ihakia
matoha hobi 'abakia, ia hanona mahi atana drag-
ona hauna pinanai, mai aiahu mahina pinanai,
mai mahabanai hauna bai'oina pinanai tekarahi.

¹⁴ Ia hanona tiaporo aubakia ki'a obokia, hoa
mai bata'uta'u huri akakia tibabai, ba ia hanona

* **16:13:** (13) 'ao 'opukia

tikarahi hanopaka maikoina ena obia 'arana haukia katebararonakia Hiabu ikoinai Tiramana ena bakai wapuna apa'uana kemai raninai katehuarina.

¹⁵ Weiana aia ha aona e'abi etibaha, “Tomobahu, au hanona bainao hauna 'abana kawahi. Hau ha eno'a nemiaho mai ena habuni ebatotona nemiaho hauna hanona enamo, weiana ia hauna 'abaeana a'i kekabanai kabanai, haeamona mako wairakiai a'i kehaumaea.”

¹⁶ Ba auba ki'a obokia aihau weiakia tehore obia 'arana haukia tebararonakia 'eka weiana Heberu maeakiai atana teaparina 'Aramagedono' haunai.

¹⁷ Aneru iba'abaihau hamomona ehore ena puou maeabu aonai ebakiki oina, ba marea robe aonai obia imia'auna ahanai aia ha emai e'abi 'aota etibaha, “Aba eore.”

¹⁸ Ba kupa e'imare, ero'u, 'uru rarikia tehua, mai kanokau ki'a obokia 'akikia teka'a, kanokau ua homana ha a'i eka'a 'apua ua'i baha 'akinai maearima hanopakai erama raninai emai mo bariu, kanokau neiana hanona ki'a obona tohana.

¹⁹ Weiana aiara apa'uana atana Babulonia hanona epa'a paipana aihau, mai hano ikoikiai aiarakia apa'uakia hanona tepururu. 'A Tirama hanona Babulonia aiara apa'uana ena ki'a eraona 'inina, ba ia ehore ena kaputi ai Babulonia ebainuna, kaputi weiana hanona Tirama ena opuere ki'a obona waininai ebonu 'auna.

²⁰ Ba kereibua ikoikiai te'akauma, mai kobio hanona wairakia aha'i.

²¹ Abara kupai te'eho matoha pihara apa'uakia, ekia puma hanona kilogram imabui 'abana

hanona kupai te'eho maearima teahu ki'anakia, ba maearima tehore Tirama teururu aina pi-hara abarana weiana paunai, pokina ena ia'iki'a neiana hanona eki'a ki'a baha.

17

Rea Babi'ena Apa'uana Ena Puma Kehoaina.

¹ Epuā, aneru 'abaihau hamomo weiakia puou 'abaihau hamomo tea'inakia haukia 'abakia ha emai here'u ehina bena'u etibaha, "Omai, au kahore rea babi'ena apa'uana ena puma kehoaina hauna kabaihani'o, ia hanona bei bo'ona 'arakiai nemiatī.

² Hanopaka ena obia 'arana haukia rea babi'ena weiana kipokia tenabau, hanopaka maearimakia abomo ia kipokia tenabau matoha biai teinu 'ari 'abana."

³ Ba Auba Robe ao'u ebaonu 'auna, aneru weiana ehore eaoaina'u hano'akuna, weia babi'e ha aihana, aiahu mahina ha birona ahanai emia'au. Mahi weiana hauna maikoinai ata terrenakia weiakia hanona 'abi ki'a obokia Tirama herenai, mahi weiana 'arana hanona 'abaihau hamomo 'eana harau haea.

⁴ Babi'e weiana hanona habuni apupuna mai birona ebatotona, gold mai pihara namoabukia 'imare 'imarekiai, mai kutu 'imare 'imarekiai ebataitaina, imanai hanona gold 'erena ha, aonai hanona ena aka ki'a obokia mai ena nabau hoahoakia 'opukiai ebonu.

⁵ Ia pauna ahanai hanona ata bunina ha tererena,

'BABULONIA APA'UANA, HANOPAKA ENA REA
BABI'EKIA IKOIKIAI MAI TABA KI'A OBOKIA
MAIKOINAI HINAKIA.'

⁶ Ba babi'e weiana aihana hanona Tirama ena robe haukia mai Iesu pouna tehinana haukia eahu 'arinakia mai aruarukiai einu 'ari. Aihana raninai ata'uta'u huri.

⁷ Ba aneru weiana ehina bena'u etibaha, “Ae-homa buonai nuta'uta'u huri? Au kahore babi'e naiana 'abina bunikia mai mahi weiana ahanai emia'au 'arana 'abaihau hamomo 'eana harau haea hauna anina kaba'iohini'o.

⁸ Ba aiahu mahina naiana oihana hauna hanona 'uainai emiaho, ia bariu hanona a'i nemiaho, ia hanona 'uri 'ourana weiana a'ena aha'i haunai kekara'au kemai, ba keao kepururu baihana. Maearima weiakia hanopaka erama emaimo bariu hanopakai temiaho haukia, weiakia atakia mauri pukana aonai a'i tererenakia haukia, mahi weiana kateihana hanona kateta'uta'u huri, pokina ia hanona 'uainai emiaho, bariu a'i nemiaho, haeamona kemai mue.

⁹ “Maearima mai ena aobero hauna hanona neiana obona keobo, aiahu mahina arana 'abaihau hamomo hanona oeo 'abaihau hamomo, aiara weiakia babi'e epoki ainakia, mai obia 'arafia haukia 'abaihau hamomo.

¹⁰ Weiakia haukia ima hanona aba tepururu, ia ha hanona bariu nemiaho, ha hanona a'i nimai baha, ia weiana kemai raninai rani papana mo kemiaho.

¹¹ Aiahu mahina weiana 'uainai emiaho ia bariu a'i nemiaho hauna hanona obia 'arana hauna iba'ababanina, weiakia 'abaihau hamomo haukia 'abafia ha, ba ia abomo kepururu.

¹² “Aiahu mahina 'eana harau haea weiakia oihanakia hanona obia 'arafia haukia harau haea, iamo obia 'arafia haukia weiakia ekia aiara a'i

tia'i bahanakia, ia aiahu mahina kipokia obia hiabuna katea'ina beraura hoana hamona aonai.

¹³ Obia 'arana haukia weiakia harau haea ikoikiai ekia raona hanona kehamona, ba ekia tabura mai ekia hiabu aiahu mahina katebena.

¹⁴ Ba ia haukia hanona Mamoe nahu katehuarina, ia Mamoe nahu kehore keahu 'iti'itinakia, pokina ia hanona obia ikoikiai ekia Obiapaka mai obia 'arana haukia ekia Obia 'arakiai hauna, ia ti'abana haukia weiakia eaparinakia mai etina'anakia, mai aia ibabua 'au haukia hanona Mamoe nahu kipokia huari aonai ekia 'ou haukia kateahu 'iti'itinakia.”

¹⁵ Weiana aneru haeamona ehina bena'u etibaha, “Bei weiakia oihanakia ahakiai rea babi'ena emia'au, hanona maearima haeai haeai, rama haeai haeai, hano haeai haeai, mai maea haeai haeai haukia.

¹⁶ Aiahu mahina mai 'eana harau haea oihanakia haukia hanona rea babi'ena weiana 'arina a'i kate'ari, ena taba ikoikiai katea'i obonakia maihauna katehabona, bitiona kateana, iruba ai katehuhuna ke'ara obo.

¹⁷ Pokina Tirama obia 'arana haukia weiakia aokiai hanona nuatae ehorotina ena raona ikoinai katebaorena, weiana aokia katebahamomona ekia hiabu aiahu mahina katebena keobia aina, keaomo Tirama ena 'abi ketohana.

¹⁸ Babi'e weiana oihana hauna hanona aiara apa'uana, weiana hanopaka ena obia 'arana haukia ikoikiai nipoki ainakia.”

18

Babulonia Aiara Apa'uana Aba E'eho.

¹ Neiakia murikiai aneru haeai ha aihana kupai eriri emai. Ia ena hiabu hanona eapa'ua ki'a baha weiana ena nuabi ehore hanopaka maikoinai ebaea obona.

² Aiana taburanai eio aota etibaha,
 “Babulonia aiarana apa'uana
 aba e'eho, aba e'eho!
 Ia hanona tiaporo mai
 auba ki'a obokia* ikoikiai ekia
 kaimue 'ekana eao,
 roborobo 'opukia mai
 'arikia a'i ti'ari haukia
 ekia paparo'ai eao.

³ Pokina hanopaka maearimakia
 ikoikiai ia kipokia nabau
 hoahoakia ki'a obokia tebabai
 matoha ena bia pahihinai
 teinu 'ari 'abana.
 Hanopaka ena obia 'arana haukia
 abomo ia kipokia aba tenabau,
 haeamona hanopaka ena
 kawakawa haukia hanona
 enuatae ki'a tabakia
 weiakia arakia rarikiai
 ekia obia aba tebapa'uanakia.”

⁴ Ba aia haeai ha aona etibaha,
 “E'u maearima e,
 aiara naiana aonai
 tomokarahi tomai.
 Ia kipokia ki'a akakia
 a'i tomobabai haeamo marikina.
 Ia kipokia ia'iki'ana pumana
 a'i tomohoai haeamona marikina.
⁵ Pokina ena ki'a hanona

* 18:2: (2) 'ao 'opukia

aba ero'ana eaomo kupa,
 mai Tirama hanona ia ena babai
 ki'a ikoikiai niraona 'ininakia.

⁶ Ena baibeni ihobonai
 katobeni muena.
 Taba ebabaina hauna 'arana
 rani rua katohorena.
 Emi 'ere aokiai muramura
 pahihina eba'oruna
 katoinu ihobonai,
 ia ena 'ere aonai
 muramura pahihina katoba'oruna
 hanona ena tabura katoba
 kabanaina rani rua.

⁷ Ia kipona taba weiakia
 'arafia rarikia enuatae ki'a
 mai ena nuabi ebena ihobokiai mo
 katobahaiarana mai katobahaina.
 Pokina kipona aonai
 niapa netibaha,
 'Au hanona obia 'arafia
 babi'e'u mo ha namati,
 au hanona wapu aha'i,
 mai au hanona a'i kahai 'apua.'

⁸ Ua buonai wapu hamona aonai
 ia ia'iki'ana akafia ikoikiai
 ketabu ahinafia,
 'ari, hai mai arobo.
 Haeamona ia hanona iruba aonai
 ke'ara obo.
 Pokina Obiapaka Tirama
 ia nibabakaina hauna hanona
 etabura ki'a baha.

⁹ "Hanopaka ena obia 'arana haukia ia kipokia
 tenabau mai ena kepu teonamoai haeamo

haukia hanona iruba weiana hiabuna nikara'au
katehana raninai katehai 'ari ki'a baha.

¹⁰ Ena hau haiara paunai, kateta'u ki'a atau'ai
katekoroti katehai kate'abi,
'Eki'a ki'a baha,
eki'a ki'a baha.
Babulonia aiara apa'uana
mai taburana e,
beraura hoana hamona 'akimo
aonai puma ohoaina.'

¹¹ "Hanopaka ena kawakawa haukia abomo
katehai 'ari ki'a baha, pokina ekia kawakawa
tabakia hanona hau ha a'i kekawanakia.

¹² Kawakawa tabakia weiakia hanona gold
mai silba, pihara namoabukia mai kutu
'imare'imarekia, habuni namoabukia, habuni
apupukia, habuni nibinibikia ta'eta'ekia, habuni
birokia, matiu timikia namokia haeaihaeai, mahi
atana elefant 'eanai tebabai tabakia ikoikiai,
matiu 'arakia rarikia haukia, kopa, auri mai
pihara pahihina namonai tebabainakia tabakia,

¹³ weiakia aniani timikia ibanamokia mura-
murakia atakia sinemon mai spaisi, muramura
timikia 'orimokia atakia insense mai mira, mai
muramura taburana hauani katetarona hauna,
waini mai olibe hohona, parawa namokia, witi,
poromakau mai mamoe, hoti, mai kariota, ta'ara'i
haukia, mai maearima ekia mauri.

¹⁴ Taba tikawakawai haukia weiakia katehina
bena katetibaha,
'Babulonia e,
taba namokia onuatae ainakia
haukia te'akauma,
mai emu obia tabakia mai
emu nuabi tabakia ikoikiai

hanona aba te'akauma,
ba a'i kotabu ahi muenakia.'

¹⁵ “Kawakawa haukia taba weiakia ia herenai tekawa kawainakia ba monikiai teobia haukia atau'a 'akinai katekoroti, kateta'u haiara weiana ki'a obona paunai katehai 'ari ki'a baha.

¹⁶ Kate'abi katetibaha,
'Eki'a ki'a baha,
aiara apa'uana herena
eki'a ki'a baha.
Habuni namoabukia,
apupukia, mai birokia
obatotonakia, gold,
pihara namoabukia 'imarekia,
mai kutu 'imarekiai otaitai.

¹⁷ Beraura hoana hamona aonai emu obia tabakia neiakia ikoikiai hanona aba tepururu.'

“Aunohi kapena haukia ikoikiai mai tehe'au tiharima haukia ikoikiai, aunohi ai tiaka haukia ikoikiai mai ekia mauri 'akuai tikaoao aina haukia ikoikiai atau'ai katekoroti.

¹⁸ Ia ni'ara hiabuna nikara'au kateihana rani-nai kateio katetibaha,
'Aiara tabana hanona aiara apa'uana neiana 'abana?'

¹⁹ Arakiai apuroro katehore 'aunakia katehai 'ari ki'a baha katetibaha,
'Eki'a ki'a baha,
aiara apa'uana herenai
eki'a ki'a baha,
mai ekia aunohi 'aku kapenai
haukia ikoikiai oi emu
obia tabakiai kepu haukiai teao,
'a beraura hoana hamona 'akimo
aonai oi aba opururu.

20 Tomoaonamo.

Kupa, mai Tirama ena robe haumi,
 mai iuhubeau haumi,
 mai mahabanai haumi e,
 tomoaonamo ki'a baha,
 Tirama ehore ia puma ebahoaina
 pokina ia wai heremiai
 ebagai ki'a paunai.' ”

21 Ba aneru taburana ha ehore iata rarina
 'akina ha ea'i taeara 'aku aonai ekapo uhuna ba
 e'abi etibaha,

“Taeara nei ana ihobonai
 Babulonia aiara apa'uana
 'aku aonai katekapo uhuna,
 ba a'i kateiha muena.

22 Kita atana hap tipapura aina
 haukia ekia 'uru namokia,
 mai hui a'itaea haukia,
 marori mai pihi ubai haukia
 'urukia namokia oi aomuai
 a'i kateo muena.
 Oi aomuai aka haeai haeai
 tibabai haukia ha
 a'i katetabu ahi muena.
 Oi aomuai tona tiorina 'uruna
 a'i kateo muena.

23 Ramepa eana ha oi aomuai
 a'i ke'ara mue.
 Hawainibe mahamaha hauna
 mai babi'ena aiakia oi aomuai
 a'i kateo'o muenakia.
 Neiakia katerama pokina
 emu kawakawa haukia hanona
 hanopaka ena maearima
 apa'uakiai teao,
 oi emu nepuai hanona

hanopaka maearimakia
 o'oi ahinakia.
²⁴ Babulonia aiara apa'uana
 hanona puma ehoaina
 pokina ia aonai mahabanai haukia
 mai Tirama ena robe haukia
 aruarukia tetabu ahinakia,
 mai hanopaka ahanai
 teahu 'arinakia haukia
 ikoikia aruarukia.”

19

Kupa 'Ubinai Teio, Haleluia!

¹ Neiana murinai, au 'uru ha aona 'uruna ma-
 toha maearima to'una rarina kupa 'ubina teio
 tetibaha,

“Haleluia! Hamabanamona.
 Bamauri, nuabi, mai hiabu
 hanona eka Tirama 'euna.

² Pokina ena bakai hanona
 tohana mai ebero.

Tirama ehore rea babi'ena
 apa'uana puma ebahoaina,
 ena maha porepore babai ki'ai
 hanopaka ea'i ki'ana paunai.

Tirama ena ta'ara'i haukia
 teahu 'arinakia aruarukia
 'arabia aba ebamuena.”

³ Haeamona teio mue tetibaha,

“Haleluia! Hamabanamona.
 Aiara apa'uana ni'ara
 mai hiabuna nikara'au
 a'i kepua 'apua keaomo
 banaibanai.”

4 Ba kiro haukia harau rua bani mai mauri tabakia bani tekaipehu Tirama weiana obia imia'auna ahanai emia'au hauna tekuti aina, ba teio tetibaha,
 “Amen, Haleluia!”

Mamoe Nahu Ena Hawainibe Tatuna.

5 Ba weia obia imia'aunai aia ha emai etibaha,
 “Ena ta'ara tua'ina haumi ikoimiai mai maearima ikoimiai weiami papana mai apa'uana ia tumariki aina haumi ikoimiai, eka Tirama hamabanamona.”

6 Ba 'uru ha aona, 'uruna matoha mako rarina 'akina 'ao roio rarikia tihara puni 'ao kupa niro'u 'uruna rarina 'abana teio tetibaha,
 “Haleluia! Hamabanamona. Pokina Obiapaka aika eka Tirama hiabu ikoinai hauna nihore aika nipoki ainaka.

7 Aoka kenamo, kahaonamo ki'a, ia nuabi kahabena. Pokina Mamoe nahu ena hawainibe ranina aba ekara'au, haeamona keatawana babi'ena abomo aba eba'oru.

8 Habuni namona atana linen erau'a mai ne'imare hauna tebena kebatotona.”

(Habuni namona weiana anina hanona Tirama ena robe haukia aka berona tebabaina haukia.)

9 Ba aneru ehina bena'u etibaha, “Abi neiana morerena. Tebeaubeau benakia Mamoe nahu ena hawainibe tatuna aonai temai haukia hanona tenamo.” Haeamona e'abi mue etibaha, “Neiakia hanona Tirama pinana 'abikia tohakia.”

10 Weiana au aneru weiana aena pokinai akaipehu kakuti aina, 'a ia au ehina bena'u etibaha, "A'i kokuti aina'u! Au hanona ta'ara'i hau'u 'abaea'u, oi 'abamu mai uaho'abamu Iesu ena pou tehinana haukia 'abakia. Tirama ikupai-ianamo kahakuti aina! Pokina Iesu ihina pouna hanona mahabanai hiabunai."

Hoti Porena Ahanai Emia'au Hauna.

11 Epuā, au kupa ekaikau hoti pore obona ha waira'uai aihana, ahanai emia'au hauna atana hanona 'AIA IBABU'AU' mai 'TOHA TOHANA' Ia hanona bero paipanai nibabakai mai nehuari.

12 Mahana ihakia hanona matoha iruba neupa 'abana, aranai hanona obia ibau'ukia bo'okia, ia ahanai hanona ata ha irere'au ba hau ha ata weiana a'i e'iohina, 'a ia kipona mo e'iohina.

13 Ena habuni homa'ana ebatotona hauna hanona earuaru obo. Ia atana tehinana hanona 'TIRAMA ENA 'ABI'.

14 Kupa ena huari haukia ia murinai te'au, hoti porekiai temia'au, habuni namokia atakia linen tebatotonakia, tepore obo mai terau'a.

15 Pinanai hanona kareba nihena eara hauna nikarahi, ena aka hanona hano haeai haeai haukia keahu 'iti'itinakia, ba ia kehore auri ikai'iniai kepoki ainakia. Hiabu ikoinai Tiramana ena opuere kebatohana 'ekana bine buabuana ibahari 'iti'itina 'ekanai kehe 'iti'itinakia.

16 Ena habuni ahanai 'apena tainai hanona ata neiana ererena,

'OBIA 'ARANA HAUKIA IKOIKIAI EKIA OBIA
'ARAKIA HAUNA MAI OBIA IKOIKIAI EKIA
OBIAPAKA.'

17 Ba aneru ha beraura aonai ekoroti aihana, roborobo kupa baiatanai tirobo haukia ikoikiai

eapari 'aotanakia etibaha, “Tomai, Tirama ena tatu apa'uana tomoto'u.

¹⁸ Weiana wai hanona obia 'arana haukia, huari poki haukia, mai tabura haukia bitiokia katoani, hoti mai hoti ai temia'au haukia bitiokia katoani, mai maearima ikoikiai weiakia ta'ara tia'i haukia mai ta'ara a'i tia'i haukia, papakia mai apa'uakia bitiokia katoani.”

¹⁹ Ba aiahu mahina weiana mai hanopaka ena obia 'arana haukia mai ekia huari haukia kipokia teto'una aihanakia, tenuatae hoti porenai emia'au hauna ena huari haukia kipokia katehuari.

²⁰ Iamo aiahu mahina teahuna tea'i maurina, ena mahabanai hauna bai'oina ohi, Mahabanai hauna bai'oina weiana hanona aiahu mahina wairanai bata'uta'u huri hoahoakia ebabai hauna, hoahoa weiakiai aiahu mahina mani'ana tea'ina mai ena kaiba'uku tekuti aina haukia e'oi ahinakia. Weiakia terarua mauri maurikia iruba 'obuna weiana pihara mai irubana atana salpa ni'ara banaibanai 'ekanai tekapo uhunakia.

²¹ Weiana hoti porena ahanai emia'au hauna ehore pinanai kareba ekarahi haunai 'ou haukia ikoikiai eahu'ari orenakia, ba roborobo ikoikiai bitio weiakiai teani 'ari.

20

Keriso Kipokia Kateobia Ihau Taha Hamona.

¹ Epuu, aneru ha kupai ekarahi eriri emai aihana, imanai hanona 'uri 'ourana a'ena aha'i hauna kina mai tabiri apa'uana ha ea'inakia.

² Ia ehore mahi atana dragona weiana 'erau 'ai'aina hauna ea'ina, mahi weiana hanona Tia-poro 'ao Satani, ba tabiriai ebiri 'inina ihau ikoinai taha hamona kemiaho aina.

³ Aneru weiana ehore mahi weiana 'uri 'ourana a'ena aha'i hauna aonai ekapo utana ba ekaiabu 'inina, mai ahanai rauhuhu hoana ehoretina, weiana ia hanopaka maearimakia a'i me'oinakia keaomo ihau taha hamona, weiana murinai hanona kerubuna kemiaho rani papana.

⁴ Epuā, obia imia'aukia aihanakia, ahakiai temia'au haukia hanona hiabu tea'ina katebabakai. Haeamona weiakia Iesu pouna tehinana mai Tirama ena 'abi tehinana paukiai 'akokia tekabe hurinakia haukia aubakia aihanakia. Ia hanona aiahu mahina weiana 'ao ena kaiba'uku a'i tekuti aina mai ena mani'a paukia ahakiai 'ao imakia ahakiai a'i tea'ina haukia. Ia hanona temauri mue Keriso kipokia teobia ihau ikoinai taha hamona.

⁵ Neiana hanona 'ariai mikirimue kori'uaina. ('Ari haukia harina maikoina hanona a'i temauri mue eaomo ihau ikoinai taha ha ekabanai.)

⁶ Maearima weiakia mikiri mue kori'uaina aonai katemiaho haukia hanona tenamo mai terobe. 'Ari ibaruana hanona ena hiabu aha'i ia herekiai, 'a ia hanona Tirama mai Keriso ekia robe akakia ibabaikia haukiai kateao, mai kipokia kateobia haeamo keaomo ihau ikoinai taha hamona.

Satani Iruba 'Obunai Tekapo Uhuna.

⁷ Ba ihau ikoinai taha hamona keore murinai hanona Satani ena wapura 'ekanai katerubuna.

⁸ Satani kekarahi keao hanopaka maikoinai hanopaka maearimakia ke'oinakia, weiakia

itubu rua Gog mai Magog kebato'unakia huari kateao. Ekia bo'o hanona kebo'o ki'a baha matoha poe 'anona 'abana.

⁹ Hanopaka maikoinai tekabanai teao Tirama ena maearima temiaho 'ekana mai ena raona'au aiarana tekori kakaiarona. Iamo iruba kupai eriri 'eho huari haukia weiakia maikoinai eba'ara obonakia.

¹⁰ Ba tiaporo weiana ia e'oi ahinakia hauna hanona weia pihara mai irubana atana salpa ni'ara 'obuna aonai tekapo uhuna, aiahu mahina mai mahabanai hauna bai'oina tekapo uhunakia 'ekana. Weia teaihau puma kate hoaina mararani mai rabi keaomo banaibanai.

Obia Imia'auna Apa'uana Porenai Emia'au Hauna Ena Bakai.

¹¹ Epuā, obia imia'auna apa'uana pore obona ha mai ahanai nemia'au hauna aihana. Hanopaka mai kupa hanona wairanai tekaobo tai ha a'i eiha muenakia.

¹² Ba 'ari haukia aihanakia apa'uakia mai papakia Tirama ena obia imia'auna wairanai teko-roti, ba aneru puka tekai kaunakia, baiatakiai puka haeai ha abomo tekaikauna weiana hanona mauri pukana. 'Ari haukia ekia babai puka aokiai irere ihobokiai eba bakainakia.

¹³ 'Aku aonai te'ari haukia 'aku ehore euhu 'aunakia, haeamona 'ari mai 'ari haukia ekia 'eka tehore ekia 'ari haukia teuhu 'aunakia. Ba maearima ikoinai hanona ha ha ekia babai ihobohobokiai ebabakainakia.

¹⁴ Murinai 'ari mai 'ari haukia ekia 'eka abomo iruba 'obuna aonai tekapo uhunakia. Iruba 'obuna weiana hanona 'ari ibaruana.

15 Maearima weiakia atakia weia mauri pukana aonai irere aha'i haukia ikoikiai hanona iruba 'obuna aonai tekapo uhunakia.

21

Kupa Mahamahana Mai Hanopaka Mahamahana.

¹ Epuā, maha'u eao kupa mahamahana mai hanopaka mahamahana aihanakia, pokina kupa kori'uaina mai hanopaka kori'uaina aba te'akauma, 'akupaka abomo wairana aha'i.

² Ba aiara robena aihana, Ieruselema mahamahana, Tirama herenai kupa 'ubinai eriri emai. Aihana ihana matoha hawainibe mahamaha babi'ena tebataitai haraina teba'oruna atawana 'euna 'abana.

³ Ba aia ha obia imia'aunai emai aona e'abi 'aota etibaha, “Bariu Tirama ena miaho 'ekana hanona maearima herekiai, Tirama hanona ia kipokia katemiaho, ia hanona Tirama ena maearimai kateao, Tirama kipona hanona ia herekiai kemiaho, haeamona ekia Tirama ai keao.

⁴ Ia kehore mahakia beikia ikoikiai mahakiai keutu obonakia, ba maearima a'i kate'ari mue, a'i kateako'o mue, a'i katehai mue, mai a'i katehaiara mue, pokina taba 'ai'aikia weiakia hanona aba te'akauma baihana.”

⁵ Epuā, obia imia'auna ahanai emia'au Tiramana e'abi etibaha, “Tomobahu, Au taba ikoikiai aba nababai maha mahanakia!” Haeamona ehina bena'u etibaha, “'Abi neiāna hanona morerena pokina 'abi neiakia hanona toha tohakia mai aokia tohakiai katea'i taeanakia.”

⁶ Ba haeamona ehina bena'u etibaha, “Taba ikoikiaia aba ababai orena. Au hanona Alepa mai Omega, Kori'uaina mai Murihaina. Ia'iramana mai Iapuana hau'u. Hau ha 'akona ni'ororo hauna au kahore mauri beina nebuti 'arana aha'i hauna kabena keinu.

⁷ Ena a'ikakauma ketabura, ki'a aokiai kekabanai hauna hanona itauna neiakia ikoikiaia kea'inakia, ba au hanona ia ena Tirama ai kaeao, ia hanona au naha'u ai keao.

⁸ Iamo 'ubo haukia, a'i tia'ikakauma haukia, aka ki'a haukia, ahua hu haukia, nabau haukia, nepu haukia, kaiba'uku tekuti aina haukia, mai bai'oi haukia ikoikiaia ekia 'eka hanona iruba 'obuna weiana pihara mai irubana atana salpa ni'ara banaibanai 'ekana aonai. Neiana hanona 'ari ibaruana.”

Ierusalemama Mahamahana.

⁹ Epuu, aneru ha emai here'u, ia hanona aneru 'abaihu hamomo weiakia puou 'abaihu hamomo aokiaia ia'iki'a tabakia orekia 'abaihu hamomo tebabonunakia tea'inakia haukia 'abakia ha, ba ehina bena'u etibaha, “Omai neia, au kahore hawainibe mahamaha babi'ena kabaihani'o, ia hanona Mamoe nahu atawana.”

¹⁰ Weiana Auba Robe ao'u ebaonu 'auna ba aneru ea'ina'u eaoaina'u oeo ha apa'uana ba'ona 'ubinai, ba aiara apa'uana robena, Ierusalemama, ebaihana'u Tirama herenai kupa 'ubinai neriri nimai.

¹¹ Tirama ena nuabi hanona aiara neiana ebaea obona, ena 'imare hanona matoha pihara namoabuna atana daiamond 'abana, eiroro ki'a matoha karati 'abana.

¹² Aiara neiana ena ara hanona eapa'ua mai ero'e, pa'abina hanona harau haea rua, pa'abina ha ha herekiai hanona aneru ha ha tikoroti temiaho haukia ikoinai harau haea rua. Pa'abina ha ha ahakiai hanona Isaraela itubuna harau haea rua atakia ha ha tererenakia.

¹³ Pa'abi aihau hanona taetana tainai, ha aihau hanona tototaina tainai, ha aihau hanona ahi-taina tainai, ha aihau hanona tibotaina tainai.

¹⁴ Aiara apa'uana arana ena kori'au piharakia hanona harau haea rua, ahakiai Mamoe nahu ena iuhubeau haukia harau haea rua atakia tererenakia.

¹⁵ Aneru weiana ehina bena'u hauna imanai hanona ikai'ini ha gold ai tebabaina hauna ea'ina, ba aiara apa'uana, mai ena pa'abi, mai ena ara kehobonakia.

¹⁶ Aiara ebakorina 'uni'unina bani baiatakia hanona teihobo, ena homa'a mai ena mata abomo ihobo, ikai'iniai aiara ehobona ba ena homa'a etabu ahina hanona kilometa taha rua hinabu rua (2,200), ena ro'e abomo teihobo.

¹⁷ Aneru ehore ara ena imuki* ehobona hanona meta imabui harau haea 'abaihau (66), aneru hanona maearima ekia hobohobo ihobonai ua ehobo aihona.

¹⁸ Ara hanona pihara namoabuna atana daiamond ai ebakorina, ba aiara apa'uana hanona gold tohanai ebabaina eiroro ki'a matoha karati 'abana.

¹⁹ Aiara ebakorina arana ena kori'au piharakia hanona pihara namoabukia haeihaeai ikoinai harau haea rua ai ebataitainakia, pihara namoabukia atakia hanona neiakia, kori'uaina

* 21:17: (17) 'ao bao

hanona daiamond, hauna eiroro, ibaruana
hanona sapaia, hauna epurutoni, ibaihauna
hanona kalakedo, hauna e'apuro, ibabanina
hanona emerald, hauna ekupa,

²⁰ ibaimana hanona sadonu, hauna ebiro-
biro, iba'abaihauna hanona rubi, hauna ebiro,
iba'abaihau hamomona hanona krusolito, hauna
ewaima, iba'ababanina hanona berulio, hauna
ekupa, iba'ababani hamomona hanona topa-
sio, hauna eiroro, ibaharau haeana hanona
krusoparaso, hauna ekupakupa, ibaharau haea
hamomona hanona huakinto, hauna epurutoni,
mai ibaharau haea ruana hanona ametuso,
hauna e'apupu.

²¹ Ara pa'abikia harau haea rua ba pa'abi ha
ha hanona kutu porekia rarikia 'imare 'imarekiai
tebabainakia. Aiara ibuana taearakia ikoikia
hanona gold tohana 'abaeana, teiroro ki'a matoha
karati 'abana.

²² Au aiara weiana aonai Marea Robe ha a'i
aihana, pokina Obiapaka hiabu ikoinai Tiramana
mai Mamoe nahu hanona aiara Marea Robena.

²³ Aiara apa'uana weiana hanona beraura 'ao
nawa eakia a'i nenuatae, ia ahanai a'i kerara,
pokina Tirama ena nuabi hanona aiara nibaeana
Mamoe nahu hanona aiara ena ramepai niao.

²⁴ Hanopaka maearimakia aiara eanai
kateka'a, haeamona hanopaka ena obia
'arana haukia hanona ekia nuabi haeai haeai
kateaoainakia ia aonai.

²⁵ Pa'abi hanona rani ikoinai a'i katekaiabu
'apuana, pokina rabi hanona weia aha'i.

²⁶ Hanopaka maearimakia hanona ekia nuabi
tabakia mai ekia obia tabakia aiara weiana aonai
katekatoto ainakia.

²⁷ Iamo 'opu tabana ha a'i ketoto mai hoahoa ki'a obokia tebabai haukia 'ao bai'oi haukia ha hanona aiara weianai a'i kekatoto 'apua, iamo weiakia atakia Mamoe nahu ena mauri pukanai tererenakia haukia mo katekatoto.

22

Mauri Beina Atena.

¹ Epuā, aneru weiana ehore mauri beina atena eba ihana'u, eiroro wairai matoha karati 'abana. Ba Tirama mai Mamoe nahu ekia obia imia'aunai eharu riri emai,

² ba aiara taearana apa'uana ibuanai eharu ririna. Ate 'arana abira abira hanona matiu weiakia mauri tibaibeni haukia tekoroti, ihau hamona aonai hanona rani ikoinai harau haea rua buabuakia tiba ramanakia, nawa ha ha aokiai tebua'a. Ia raukia hanona hanopaka maearimakia ikoikia ekia inawa ibanamokia tabakia.

³ Aiara weiana aonai hanona Tirama ena ururu ba'anai temiaho tabakia ha weia a'i kahatabu ahina. Pokina Tirama mai Mamoe nahu ekia obia imia'auna hanona aiara weiana aonai kate miaho. Ena ta'ara'i haukia katehore ia katekuti aina,

⁴ ba ia wairana kateihana, haeamona Tirama atana hanona paukia ahakiai irere 'au.

⁵ Rabi ha weia keaha'i, ramepa 'ao beraura eakia hanona a'i katenuatae ainakia, pokina Obi-apaka Tirama kehore ea kebenakia. Haeamona ia hanona obia 'arana haukiai kateao katepoki keaomo banaibanai.

Iesu Aba Kemai.

⁶ Epuā, aneru weiana ehina bena'u etibaha, “‘Abi neiakia hanona toha tohakia mai kateba

tohanakia. Obiapaka Tirama weiana mahabanai haukia aubakia niba taburanakia ia pouna tehinana hauna ehore ena aneru euhuna taba aba katerama haukia ena ta'ara'i haukia keba ihanakia.”

⁷ Iesu e'abi etibaha, “Tomobahu, Au hanona aba kawahi, mahabanai 'abikia puka neiana aonai tika'ainakia haukia hanona tenamo.”

⁸ Au Ioane hanona taba neiakia aihanakia mai 'urukia ao'o. Ba aia ao'o mai aihanakia murinai, taba neiakia ebaihana'u aneruna aena pokinai akaipehu kakuti aina nahoma.

⁹ Iamo ia ehore au ehina bena'u etibaha, “A'i kokuti aina'u. Au hanona ta'ara'i hau'u oi 'abamu mai uaho'abamu mahabanai haukia 'abakia mai puka neiana 'abina te'ima haraina haukia ikoikiai 'abakia. Oi hanona Tirama ikupaiana mo kokuti aina.”

¹⁰ Haeamona aneru weiana ehina bena'u etibaha, “Puka neiana ena mahabanai 'abikia a'i kokaiabunakia, pokina neiakia ikoikia katerama ranikia hanona aba herekai.

¹¹ Maearima weiakia ki'a akakia tibabai haukia hanona ki'a akakia temebabai, weiakia hoahoa 'opukia tibabai haukia hanona hoahoa 'opukia temebabai, weiakia bero akakia tibabai haukia hanona bero akakia temebabai, weiakia tirobe haukia hanona temerobe.”

¹² Iesu e'abi etibaha, “Tomobahu. Au hanona aba kawahi. Au kahore ikoimiai emi babai ihobokiai ha ha 'arami kabenimi paunai, 'arami hanona kawahi ainakia.

¹³ Au hanona Alepa mai Omega, Kori'uaina mai Murihaina, taba ikoikiai ia'iramakia mai ibapuakia hau'u.”

14 Ekia habuni teutunakia haukia hanona ten-amo, weiana ia hanona bero katea'ina mauri nibaibeni matiuna buabuana kateani, mai aiara weiana Ieruselema mahamahana pa'abina aonai katekatoto.

15 'A aiara weiana kapenai hanona maearima weiakia waeha 'abakia haukia, nepu ba'ari haukia, nabau hoahoakia ki'a obokia tibabai haukia, ahuahu haukia, kaiba'uku tekuti haukia, mai maearima weiakia bai'oi 'arina ti'ari ekia 'abi'abiai mai ekia hoahoai tibi'oi haukia ikoikiai.

16 “Au Iesu hanona e'u aneru auhuna ewahi 'abi tohakia neiakia kebaibeni wai* Tirama ena marea haumi heremi. Au hanona Davida obia 'arana hauna Ramuna mai ena rama hau'u. Au hanona raurani bihiuna 'imarena.”

17 Auba Robe mai hawainibe mahamaha babi'ena ohi ti'abi tetibaha,

“Omai!”

Tabana aia neiana niona hauna abomo me'abi metibaha,

“Omai!”

Tabana 'akona ni'ororo hauna hanona kemai. Abomo tabana nenuatae hauna hanona kemai mauri beina 'arana aha'i hauna keinu.

18 Puka neiana ena mahabanai 'abikia tiona haukia ikoikiai narobenakia. Hau ha 'abi neiakia ahakiai 'abi haeai ha kehore 'auna raninai, Tirama kehore ia'iki'a tabakia puka neiana aonai irere haukia ia ahanai kehore 'aunakia.

19 Ba hau ha mahabanai pukana neiana aonai 'abi ha kea'i parena raninai, Tirama kehore ia ena itau weiakia mauri nibaibeni matiuna ahanai hauna mai aiara robena aonai hauna, weiakia

* 22:16: (16) 'ao oi

puka neiāna aonai robakia teahu haukia, ia herenai kea'i parenakia.

²⁰ Iesu, taba neiakia 'abikia nehina pounakia hauna netibaha,

“Abi tohana,
au hanona aba kawahi.”
Amen. Obiapaka Iesu e,
'omai.

²¹ Nabahuba'ari, Obiapaka Iesu ena aoko'o hoana hanona Tirama ena maearima ikoimiai heremiai kemiaho. Amen.

'Abi'uai Apa'uana Mahamahana
The New Testament in the Waima Language of Papua
New Guinea
Nupela Testamen long tokples Waima long Niugini

Copyright © 2002 Wycliffe Bible Translators, Inc.

Language: Waima

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-20

PDF generated using Haiola and XeLaTeX on 18 Apr 2025 from source files dated 31 Aug 2023

cec16783-6218-5812-9255-85478fb5e61c